

景
文
集



景文集卷五十五

宋

宋

祁

撰



啓

上端公啓

伏念祁凡近之姿蹇運有素體中論黥曾不平癡稷下
從談何嘗名學徒以遭時文教記訓師門追琢其章丹
青厥采誤興廉于舉目叨服事于官儀向屬閣下中執
鬻威外臺握節更張治具森布懿綱以一介之孤生戴
二天之巨庇賦角弓而植嘉樹寶燕石以裏重緹用法

語而發蒙露薦章而保往雖有小紙必勅其報書弗遣
長刀揖之而就席乃至官刑百謫民政一埤人有多言
課裁自脫免攸司之効舉俾終歲以罷還任非異人我
叨其賜和以濫恩慈展叨秩京司洵奉上臺之符入佐
冑筵之講已綸而綽大畏于罔功旣負又乘自虞以致
寇斯蓋伏遇閣下顯持邦論攸育士材品以月更言無
人廢謂飾之犧象莊生之材可收謂試之蠟封督郵之
馬差勝遵茲德賞溢彼智涯不然者蘧條咸施記入官
師之用猪苓馬敦奚參藥籠之珍由技飾之驟加俾懦

辱而與進敢忘日省上誤爾知有肺附以內銘豈喙長
之彈敘

上大各相公啓

伏自險釁所鍾痼瘵亡幾竄身忼日續喘窮年託民屋
以尸居顧仕塗而雨絕坯陶舊賜有墜無酬土苴餘生
從憂得損罔敢修于奏記非自棄于所天蓋乃秉國地
尊負薪病力距躍思勉旣匪所宜窮咽萃中無容多訴
至于兩兩相邇曉然識乎泰階奄奄苟存居爾同于舊
物去冬十一月郢州從事谷昌言取道瘞邑傳誨論辭

不圖荒窘之餘尚齒慈憐之末秋陽委燭部屋賴其容
 光生符下招埋醜幾乎復固無言敘感有死如歸且承
 太尉相公移總師垣并提武節暢威有北全重本朝屹
 柱石于兩楹隱金湯于萬里鄧侯輔漢以上宰而分麾
 召伯佐周抗二公而居外臥收民頌簡在帝衷而禱式
 苦廢殘阻聞風采窮生如繫徂景易道溯東閣之故賓
 長懷請見倚博陽之陰德脫冀重蘇獲報萬分迺為宿
 計過茲而往未識所期卑情無在望風銜賜感服哀迷
 之至

壽州到任謝兩地啓

案啓內年月與本
集謝上任表相符

奉去年六月十一日敕差知壽州已干今月七日禮上
 訖東楚地雄左符任劇祇膺簡授舉萃震惶伏念和天
 與朴愚任緣熙泰嚮由冗劇超備從官嘗用親嫌不任
 煩使日費大官之膳坐代上農之耕間不遑居懇求自
 試事關三府恩許一麾值劇部之將更果紬書而被選
 淮肥之奧國府逋經夫井浩繁稻魚豐賤承邦條之寬
 大洽方俗之樂和雖曰不能斬新與政斯蓋門下邁茲
 九德模我彝倫在善埴以埏和俾薄材而進齒捫心揆

寵念德知歸署吏牘以云初扣車茵而未日參并感結
拙喻端倪

定州謝到任上兩府啓

昨奉詔書就移前件官者仰對明綈俯循華組地由邊
重帥以儒榮任不值能顏無容愧竊念神短謀腐學病
質衰年自宜力于藝文不應彊以軍旅比者承乏真定
臨制中權率職半朞無治言狀方襍被以須去俄假節
而益遷進領博陵采控幽朔營屯雲集亭障蟬聯列屬
九州有宜得便子事哀衆十萬無日不討于師號爲劇

藩當待賢牧寧咨鯁懦再忝僉俞伏以閣下明總庶官
輔興邦緯廣十取五之路收百有一之長謂愚可矜雖
拙有用遂俾文吏超攝元戎所賴敵運百年天聲萬里
戍餘卧鼓歛息城無早鬪之虞操筆可制豪傑之驕持
簿可期租賦之入倚國爲重積日賞勤不然巢林一枝
素省身而斂分假令入竹萬箇甘贖罪于曠官埏冶不
私畔幪知所

定州到任回諸官啓

解符真定易地中山未成五月之勞復忝萬夫之長適

詢副貳竝屈俊雄得聯紙尾之銜參軍幕庭之選息藩
爲幸庇短云初何枉勤私先貽慶問叢麻可倚誠有助
于飛蓬揚糝在前恐貽羞于嘉穀內名質惠實託餘光
就部方勤盡言安叙

賀孔諫議上任啟

伏承諫議改佩使符近臨鄉社咨諏今日宣布寬條惟
盛德之世祠冠大東之誦訓于將沃若式觀上冢之容
粉米礮如更重趨庭之訓猥迂緘翰申費公儀矧禮義
之舊邦加中和之美化諒無遲報久沃詳求感戢傾勤

併萃中府

定州到任啟

今者祇奉詔期已如官次薦煩假節益壯護邊內循空
虛日用慙震伏以中山之劇朔北稱雄廩帑萬楹鎧械
億計暢轂蔽野高墉彗雲屯壁駢集以相望諸將奔走
而聽命宜待才選庸緝事經而祁衰老之餘懦怯有素
傷羽不擇林以息窮鱗僅得水而安何意朝僉過仍師
節賴名臣之前治輯郡務而有條坐遵成規便足爲政
短髮雖白幸弗事于論兵髀肉自完況無需于汗馬永

言榮遇特出誤知冀一割之可求詭萬分而爲報宿箴
仍率瞻屏爲勞

上兩地謝赴闕啟

今月七日奉被敕書候替人到交割訖發來赴闕者彌
年假守有詔代還許訖交章趣令上道榮生望表抃激
情端伏念祔向以塵枵忝班禁近病多告數量極謗興
恩俾典州責深共治雖勉迂儒之學曷揚循吏之風幽
績屢聞殿科輒寢內遷右輔間默煩言適以元帥勒歸
邇藩須屏因蒙名節再服君軒得上銅魚之符入趨金

馬之籍肉我枯齒植其危根大鈞所陶沒齒奚報然念
支離云舊奔走相仍兩目眩昏半頭蒼白收從江海遂
安北闕之心行及桑榆敢重東隅之悔翼趨有日舌訥
難宣

回季團練啓二首

向忝從官弗經煩使請閒求見頓首自陳願遂州符習
知吏課面蒙可制副在宰司謹成數月之留乃有一麾
之授逮茲班詔始復知榮地跨蠙淮之饒鎮兼犀節之
重茗醯參會魚稻豐饒蒙幸于天酬恩曷日敢謂足下

負忘疎遠彌篤顧存勅記室以占辭付行郵而流問神
麻在握頓紆遠客之懷秋帶辭條滋結故叢之戀凡官
云始修謁未期善膏泰和式符遐禱

冒榮踰分因病早衰比不自違願諧外補一麾蒙可三
府見矜獲引壽春之章遽結承明之橐淮山勝秀杭稱
夥饒坐閣省躬會天藏疾然念間關去國晚晚驚年危
曉泔泔屢傷懷于遠道羈飛跼跼方破膽于虛弓庀職
云初趨風未日永言悵戀拙布謝詞

回朱給事啓

比者給事入修覲禮奉望帝暉颯壘爲儀重漢庭之皓
首任圖注意眷商國之舊人亟奉綠綈再躋青瑣會細
書之共治掩靈淵以疏封自霜籥之丁辰抗風旌而首
路恭承便日已振寬條遽沐飛文曲敦永好伏祝青松
貫歲援君誓以未忘零雨在天詠我來而均企方期楨
朽薦託雲陰何煩記室之善辭但服歸藏之謙德願遵
保理益輔者明蓬曲猥悰筆精罔叙

回知南京俞給事啓

嚮者多病乞麾蒙恩假守危心積悸劇務間嬰逃瞻萬

戶之康都曠致一函之私禮心焉慕嚮日以翹涓不謂
給事垂眷下邗遠形芳牘至言抉曠嘉惠噓枯聿沾齋
釀之甘申遣齋刀之熟重爲褒貶交積肝膈如聞京室
之傳將被節臺之召斯人蒙福諒均愛樹之歌哲老還
朝遂重歆雲之寶王塗云穆士議載孚望安百順之宜
欽副四隣之待銘銜企願滅裂罔宣

致政侍郎啟

爾日動用佳宜某去門下已三年戍邊未得歸鬢毛禿
落衰疾相仍賴朝廷威令嚴具得以刀筆繩吏下爲供

職然日夕內慙孤太上方面之選末奈何才短責煩得
無爲老成嗚噓耶此驅使回墜教并賜沂公集副拜賜
欣感前日吾文錄遺事正天篆立鄉名今又哀文章爲
一家言獻臣冠篇示千載不疑立德立言兩無讓云

回壽州張侍中啓

案侍中卽張耆耆自陳徙壽故
州自壽徙陳啟云易地以此

嚮緣易地得遂趨風略接台華遽勤行後守藩云始進
記未遑敢謂侍中敦好士之風厚交符之契占詞記室
流問行人屈衛霍之雄稜講楚陳之盟好外依獎眷中
激衰孱官有職思書非言盡永惟銜佩姑誌誕鎔

河陽夏侍中啓

向解州符入陪禁籍鍛羽重奮勢固未安重創始平理
當滋慎不時通于奏記恐仰累于所天久而省循乃敢
參訊伏自侍中避劇右洛改鎮盟津委遠功名鎮息流
競內保元吉自存介石之誠彼有褊心弗礙虛舟之觸
卓焉高躅冠我羣倫但緣一德之隆終竚三能之冠願
崇賢老永對貞期

回趙職方啓

辱書旨諭諄諄不鄙僕麤外屈己所長以教育英才爲

言彼古君子葦然不敢當況其下耶和迂儒也才不過
中人偶以文詞塵內外制竊舊語陳言奉行文書爲宰
相假借幸不收官上過聽以爲可用故佩三印章治常
山中山出入三年無一毫異績可報天子齷齪校米鹽
責吏下而已閣下不誦以任所不能而吏推之使爲古
君子所難何哉閣下純懿之德益焉充于中世烈孰儔
然有文不自高以尙書郎佐二千石而無難色僕固知
閣下賢者也才教而育矣特未用耳賢而未用大抵當
路者貪知人之明皆願言之朝况僕所部切懷交轍哉

之邵之才不待閣下槩陳而僕景仰舊矣尚何教育之云閣下之道固將光明當時僕雖老尚能賦菁菁者莪以贊太平盛事餘不一二

與常州知郡大卿啓

嚮者大卿被十行之眷肅三翼之行少冒秋陽徑浮月夕離悰坐耿妻律遽殘比自半塗常頌雙素慮封人之未定報記室以無從恭惟視政以來介祥尤盛仁人舊里太守新藩過家上冢之樂置酒揮金之樂鄉評參慕仕路罕借諒茲愷悌之孚益助明耆之嚮攸箴異守接

武賒期擗翰遡風乃心惟極

轉端明殿學士謝執政啓

案啓中八月敕語乃至和二年之八月也

被八月日敕誥加前件職尋具奏陳讓續準九月十七日堂劄奉聖旨不許辭讓者無庸應黜有詔蒙褒冒服邇班長違孤懇伏念和性與愚狷才止枵疎一玷從官五踰閏月雖數見上而無補故不稱職而外遷寢治邊州兼護屯壘視縵胡之伍既與等夷顧章甫之儒叵爲節制上承廟算前伐敵謀用能衣朝服犒將校之勤操券最責錢穀之會牽勉常務遷延二朞方虞考課之嬰

遠誤歟言之獎進聯華殿仍秩講惟使人挾齋賜物紛
侑遠思弗聽卽寵自惟以遠戍見矜是竊師武臣之力
且論治無實何解士大夫之譏敢商爲地之端固本和
鈞之賴此蓋昭文相公茂襄昭德垂庇庶工有所不能
念先容之旣爾久而未召借賞典以當然遂令無似之
人得引以長之佩願圖涓露歸答挺鎔

回王太博謝高陽關部署啓

伏承光奉制恩出護屯壘僉擇惟允欣頌兼常執事授
器過人移忠許國肅提千騎之警參守四方之封恭惟

河間最重戎閫副貳之劇武力是資果契公言訓定師
則何冲讓之徇好眷他帥以移文切仰干城已孚干先
甲自然鄰國可假于餘光感著歡愉併萃情府

回綦撥發啓

近蒙恩檢俸領藩麾曾不遑居已茲署事顧異撥煩之
敏實孤共治之求敢謂英私特詒公誨玩書筠之溢美
均永雋之餘滋方此頒條尚賒接武瞻懷感鏤一二靡
宣

回張資政謝授職啓

伏審祇奉茂恩寵兼秘職伏惟慶慰恭以資政材資挺
傑器蘊淹華茂對亨則踐揚膺仕入侍機要顧靖密而
咸熙出殿翰垣允明良而協詠終然遴簡膺此崇褒進
規地之華聯總夾河之近輔署行詔尾歡激心靈遽辱
芳音俯循葵矩玩敷言之勤降欽約禮之優隆感抃兼
叢書辭拙喻

回張副樞讓啓

伏審光奉命書入參樞省伏惟慶慰恭惟樞密懿文經
遠茂德秉葵服在光華之辰居然王佐之器禁綸經攬

冠瑞羽以爲儀聚錦直繩卓孤風而難進上心克厭公
論所宗實驗虛席之求進預前帷之秘此焉亮采副是
疇咨遽規尙讓之文猶鬱懋官之授美言盈牘始誌于
冲懷成命隨風難淹于盛禮願回介節卽順徽章欽祝
于中厓畧非敘

回昭文張相公啟

伏審顯奉制恩冠升宰府伏惟慶慰恭以閣下遠謀沉
正徽鑒疑深外經人葵入亮王采萬事之本爰建于中
庸九德之光遂陳于歌敘鼎鉉以之增重天階爲之告

平順時登庸屬我良弼誕頒允命式進上司啓乃謨明
方資于久辟載其清靜幸賴于宗臣遽辱鈞函尚遵謙
執幸體眷求之重少矜沖退之風下慰民瞻允符公議

回陳書記啟

伏蒙尊慈以長牋盛集爲貺者申誦以還欽畏交集恭
惟記室員外雅材挺楚秀範標華直取俊科載沿仕牒
紆幄中之畫綽有香名鼓天下之辭弗忘素蘊鋪藁拜
日搜第盈編方比能于大夫使知裁于吾黨何言無狀
獲此偃藩甫揖賓儀遽行文贊研尋縟采震眩昏眸蹙

額于前雖願嘗于昌歎投人以暗得無辱于夜光匪曰
知音要之爲寶輒少留于私橐將徧詫于文林銘悚所
叢端倪拙喻

回文相公啓

文館屬吏材閣故賓停節罷州賜環蒙召得用塵構之
蔽再侍公袞之華改館授餐回車垂謁思緣舊物自忘
位貌之差耳聽名言始恨風流之淺迫守近郡遂去下
陳軟帳寵行都人駭視卽從便日已署化條伏以小國
之事大邦聘費係道刺史之見丞相韡韡走階寧有行

李之未通猥煩使者之前至書教收卹醪醴嗣頒屈公
府之彝儀眷州將之屏品餘波所潤雖涸轍而迴蘇和
氣交培諒折楊而有和望風云切離次有誅企戀門闌
飛馳心極

回八獻賦編啓

伏蒙示及新賦一編祗閱以還歆羨偕極竊惟善賦之
作本出古詩之流參大夫之九能判史家之五種有唐
取士甲令垂文揭爲試藝之程用角陳篇之妙昌辰沿
制作者寢工足下孺筮興宗雅才名世蔚奇姿于豹鞞

文乃積中徙怒翼于鵬池風斯在下暫綴修方之式回
光與計之求尚講鳴謙過詢情學列羣章于繡悅卜真
賞于熬波九變知言但服春華之瞻千篇奏御行膺夜
石之觀虔祝王塗進光賢運今茲銜佩詎及文陳第其
盛製輒收借留

回復州乾明長老啓

恭自長老和尚紹膺祖位宏闢寶坊接利衆生漫踰一
紀子孫架盛功德無邊方念未來之人或墮承嗣之託
增上我慢謗佛自私因甲令之惟行露悲心而見託永

惟大士集此勝緣宜得斯文之雄以就多礪之効猥咨
鄙思俾叙宗風業已踐言今茲具草徒成謬詬之索殆
非抖擻之辭又遇凌君景陽學該聖門書入能品特灑
鸞鵲以潤金石製爲楷書小樣一本并用寄呈但羞廢
畧之文必取天人之誦一慙所忍千翰匪宣

回夏州大王啓

伏以夕窮流火時籥凝商呂篇紀登穀之期幽土詠烹
葵之候伏惟大王懋功惟志基德有隅罄忠力于熙朝
訓威和于大夏聿臨涼序沛集蕃祺遐枉書文滋銘禮

意

回張紫微啓

自覩制恩已伸面賀竊以禁垣分乎兩掖最瀟密清雅
誥及于三王慎咨出納肇爲清著專處烝髦謹射父之
訓辭賀安于之名命允鍾聖簡尤見難才恭以舍人基
德溫恭博文精禋清白之方有裕黃中之美可餐曩屬
芝蓋時巡繪祠順祝抒頌章于帝所參御漢篇較材等
于乃神觀升周土旋貳藩侯之政久淹天吏之期最目
上還薦章交委亟汗青于冊府爰封臯于諫帷議縣官

牢直之益聊煩奏刃執左史書思之簡久次珥彤果由
宰府之試言入視上方之具草紋袍異錫台座聯輝珠
網藥階于以重凝嚴之地芝封綈檢于以裁郁穆之辭
渙號惟行公言允愜創藁金馬佇宣爾雅之風揚聲紫
微更覩垂光之盛式欽亨躅辱枉圓封味言選以終謙
鏤心微而永好

回張簡州啟

伏念絳構之吏言歸已馳報幅青天之道云遠游墜圓
封夫何漢闔之望郎尚記庾池之舊屬貫四時之操于

以示乎後凋聯十部之賢不足方其款密恭銜嘉惠永
刻煩悰惟畫隼之班春間夢魚之豐歲西人之子歌後
曲以相歡樂職之詩續遺聲而加麗妙儲真粹輔進耆
明竚中詔以疾馳綴下陳而偕賀永言翹戀修染奚宣

回徐紫微啟

自覩制恩卽伸面賀竊以表帝居之左右最重掖垣含
天憲之重輕孰先書命乃至各居一戶上法辰躔分署
五花聯光台座惟長君之慈獻總羣辟以慎咨曾是寶
賢允茲衆錫恭惟舍人元精播粹至妙揚和恥觀非聖

之書獨探大訓樂遇重華之且寢服近僚鏘鏘鳴玉之
趨婉婉長離之集青編紉史久次道山之游皓髮爲郎
不詭雲中之對澹然淵塞隱若揚休果紆繡辰之知趣
上黃扉之試奏篇甫御定命已頒躋龍鳳之靚深動虹
蜺之光采造庭近對遂視淮南之書推食延慈更重高
門之地方將發揮文誥磅礴大猷作世陽秋爲天雲漢
其綸其綍贊百度之昭明迺玉迺金追三王之灑噩適
符詠嘆遽閱函題矧叨聯事之榮何損撝謙之德愧同
前牋已出于箴揚竊仰茂松庶容于庇賴自餘祇佩罔

罄多言

回臺直李屯田啓

近叨細札尋抵劇藩本緣歲矣之恩幸有出麾之請乞
茲視事殊匪觀能倚惟聖之在寬異攸箴而脫誘敢圖
眷舊遠賜褒存曾是危心戢餘驚于摧櫓居然晚歲仰
純茂于寒松甫限麾符阻陪紳玦戀悰感緒參集于衷

回大名李相公啓

伏審光奉制恩榮分帥節伏惟慶慰恭以閣下地居賢
亮業挺謨明歷相三朝迭蕃四國直躬蹈道種德在民

具爾之瞻實同一哉之心允協比緣巨屏遴擇守臣果
屬吹塵之賢遂寵齋壇之拜使牙肅建幕府宏開包魏
壤之河山奠居都會掩天街之畢昴繫賴撫和諒此殿
邦何稽入輔祁幸聆成命參奉贊書方抃私悰遽窺鈞
翰荷巖廊之舊庇銜義府之餘恩感愧所并文陳罔逮

回外任郎官啟

幸聯郎舍晚盍朋簪間緣客鯉之來厚枉書筠之問章
兼辭篤感與愧并欽惟陵邑之封慎擇星曹之俊歲成
屹報宸獎茲蕃願遵明晦之宜交集康寧之祉竝游未

日結想何言

賀宋鼈長舍人啟

自覩制恩卽仰面賀竊以紫垣右掖上憲經星之圖內
史贊書實賦隨風之命慎咨髦譽亮采官成本國倚東
里之材聯天老上台之坐式鍾下武彌見右賢恭惟紫
微舍人粹稟天均謀經王體森然戟庫默蘊于神鋒卓
爾澗材迴標于國棟亟階撫仕茂對真期覃乎揚子之
深沈濟以荀家之惇惠道山善志徧窺典籍之林郎署
久潛厭視文書之草多士賴司南之悟薦紳歸祭酒之

尊允會講求果先圖任三槐開府聊命于試言九齒美
塗俄觀于進拜蹈紫宸而黜翰奉綠底以數辭大號有
孚至公胥協諒以鋪芬奧義粉澤遠猷賁天漢以昭回
體王縉之慎出矧茲竝命莫匪正人鄒召枚延交美得
賢之論虞渾商灝益敦稽古之規適聳歡悰遽窺華檢
佩一謙之多益非九變以窮言

代胥舍人謝啓

伏奉制命以本官知制誥者經星秘掖素號于凝嚴瑞
鷗神池驟階于機近被褒函之載郁紆賜紱以增華宿

昔自循震慚無措恭以國家裁成訓告稽合本元監渾
灝于三王討溫純于二漢猶綸之出瑟慎于始基如天
之章昭回而臨下疇咨邗彥進宿官成是必積美弼中
高文近雅挺安于秉筆之操本周興韞積之流爲國丹
青有古風烈始符僉論姑免冒居若某者生本地寒長
而祜薄偶易農而顯仕因挾策以觀書能賦能銘未習
大夫之事小言小道纔齒稗官之流濫賞相于里人預
偕來于計轍過塵策射旅贊部章歸課上臺玷名仙室
佐閩吏曹之實間圖綿野之儀日幾之繁墨綬茲忝賓

興失實切免去邦旋蒙三赦之仁追引九門之籍游膺
佐治遂俾出麾棄杖復林寒灰始焰逮終更而來上邈
歸報以無期忽被恩符參陪計局籠財權利但苦于沈
迷貳令僻名未施于鉤校俄且記言右史糾讞中都拭
玉金微之庭慎修交勸握蘭建禮之署再周序遷官謗
愈譁績幽自審方期襍被庸警敗材不謂天誘其衷人
乘所乏召詣坐槐之府趣程視草之工慕受詔而輒成
第矜拙速顧每篇而稱善絕企前修俟訖程觀當從報
罷遽荷睿明之眷擢升清切之司使驛下臨笥章垂錫

恭惟名器至重竹素具存贊內史之出方遂爲定命潤
禪謚之謀野必叩大猷分押尚書之章至均政事之食
協華在運稽古任良重念拘攣韁鎖之餘轉側風波之
後壯謀奪于多病槽學廢于長年旅翮易驚孤根難殖
責高才而或躓先下品以奚堪此蓋伏遇閣下洞燭人
彘彌綸天律亮師師之百度已惠庶工開穆穆之四門
彌收俊德曲暢陵阿之化務安薪燠之宜遂俾妄庸亦
膺簡拔敢不稽參流晷師式大常絢裘英之五紵奮刀
鉛之一割玉芝裁檢謹敷天下之言絳藥翻階居慎省

中之對庶申尺寸仰副陶埴

景文集卷五十五

景文集卷五十六

宋

宋

邢

撰

啓

回楊舍人啓

比自拜恩已嘗伸慶恭以掖居之秘參福于霄垣方贊之嚴慎司于朝冊號爲凝切常佇儁良是以言釋絲緡暢猷爲于有典筆含雷雨演膏潤于多方果位上才聿光崇簡伏惟舍人氣涵先覺道肖至和薄三代以舉英沂九流而質要奏文闕下嘗被賞于同時折論書林弗

取資于孟晉參籌計幕之次磨墨翠坳之餘帝誘乃衷
公符斯議試言丞相之府初不淹時一覽尚方之帷久
之稱善程篇甫訖寵渥俄頒排華路以趨翔竦儒紳之
歆艷改紆銅綬分署判花固已兼謀羽而修詞接嚴徐
而布武慶雲在上彌增天采之鮮瑞鷗來廷恣覽德輝
之茂適欣籲俊會枉騰書緣抒頌于丁辰厚爲言于推
轂青松云茂信爲寒日之榮嘉穀已登愈重前糠之愧
第銘謙益徧詫朋方感懇所叢奇觚安叙

回呂舍人啓

伏承茂膺制檢進直辭垣伏惟慶慰恭以舍人貫道幾
深陶天粹美顧九言而視履淬百行以保躬適時重熙
襲慶憑厚綬華若若踵仁者而與游筆語翩翩追大夫
之能賦早膺試牘參籍道山春容大音汗渙遐躡屬四
戶上選三俊程能首甄譔次之才俾草溫純之命程文
且上成命暮頌祓芝寶以摛文旅藥階而布武綸由絲
出甫光王者之言羸與經偕更盛相門之學得賢爲盛
有道維欽敢圖謙冲猥貺題啟敘撫塵之舊好衍推轂
之餘詞糠粃簸揚久負先登之愧松筠茂悅今同稟進

之榮欣感併銜精微拙喻

代回呂舍人啓

近審榮被恩章進升辭禁慶儀未展私卞已深恭以舍
人天稟粹純道資宏博飄纓初筮給曠秀科每冲挹以
自安久盤桓而不進豫章美幹茲歷歲以大成韶樂正
音非至聰之攸舍果膺試札入掌命書矧惟世職之修
尤示朝咨之愜方且雍容豹式冠映士林三代追風鼓
斯文于深厚十行視草賁神化于丹青甫頌得賢遽煩
點翰敷陳盛美感慨亨期顧茲鐘漏之餘厚齒紳綬之

後雖云閔外尚克銘藏

鄭州到任謝兩地啟

伏奉去年四月十九日詔書還舊職兼龍圖閣學士知
鄭州已于五月二十四日赴任訖避親辭劇得可賜藩
大造燭幽舉宗蒙幸伏念祁天資拙甚時事昧然盡信
古言自安素守數忝帥領并付便宜以方有爲之時責
非所習之伎類難稱職恩弗汝瑕擢領計廷正妨樞省
引訴旣苦成命改班帖以美資假之便郡地雖三輔靡
及于浩穰人匪獨賢乃叨于燕息此蓋閣下邁種陰德

題名錄
三
推衍上慈罔俾處于嫌疑遂遑寧于轉側敢忘忠敬歸
報坯陶

謝李太傅惠先令公碑文啟

比者太傅圖昭先烈仰達奏封詔大手以抒文咨健毫
而潤石義均頓首名煥京阡裝擗至精布傳彌廣偕沁
波而不腐慶貂葉以滋華謂接曩游亦詒副本申復披
文之妙周知濟美之勤感哉所叢名言罔喻

陳州到任謝兩地啟

昨奉敕移知本州卽以今日二十五日到任盤上訖收

跡遠藩改麾近屏詔蠲入謝道便之官循復寵私叢并
懽愧伏念祁性惟疏狷什偶休嘉嚮自書林得持從橐
緣不材而冒祿召多謗之抵讖大度掩容上司保恕許
寬漳濱之疾遂假淮南之章幽績殿科危心疾首謂應
罷斥翻及采甄內移六郡之雄居重四藩之選府華地
奧物衍歲穰耀質早衰顧班春而已強寒根載茂寧得
地以當然上本曲成實緣僉啟斯蓋閣下敷施陰德章
敘庶官俾下無失職之嗟使朝收善善之實猥容完士
胥洎大鈞冀自力以及羣庶有成而論報析符云恪翹

閣猶除徒爾嚮風恨無飛肉

謝官啟

昨蒙恩改前件官依舊充職者歲當大比秩許稍遷撫
 己以思愧顏無寘竊念祁早以懵學弗逮遠猷孟軻于
 事而迂安仁謂拙而信託庇材館竄名道山向緣一書
 之奏已叨三署之擢且煩申勅別計累勞因濫天官之
 擬遽陪司寇之屬不稼胡穡河干之詠已興有祿而軒
 國人之刺奚弭諒由褒品始克進升斯蓋閣下封殖危
 根青黃斷木護短無瑕示訓于師門兼愛宜廣期錫于

士類階為虛稱誤及榮途敢不三陌爾躬十思乃事少
 貪云補無墜獎憐巾幘未期簪履增戀

謝直館

仁宗本紀修內告成在明道元年十一月祁于此時試直史館

今月十九日蒙恩充前件職者祇服言綸入塵藏室用
 浮才表愧溢情涯竊念祁僕邀無能倥侗有素世微無
 仕天與數奇甫冠而孤未堪多難過時乃學遂不名家
 由鄉老以賓興參仕途而揚歷間關吏事汗巖塵容入
 陪上計之期行俟有幽之黜至今含垢善養如春回備
 責于最科俾改升于卿屬上庠乏使中詔甫留倚席窮

年離經之效如天有斗非取于挹漿譬馬食肝敢言于知味奄銜親恤自屏民塵揭白日之昭昭臥清漳而奄奄縞祥有訖食息偶存不謂執政之臣請問言上旁呼俊茂并及妄庸趣以復官敦其給札會斯干之攷室括裨海以蒙禧別寘朝班入趣會表逮膺試可愈恣無文晨葩竝春枯楊知其難艷天髦同轡駘步判其先顛幸得罷歸以懲妄進而睿明收采承弼贊襄帖紬史之美名竦羣材之缺望揆能隘薄聞命震慙且古有載言代爲不訓聞宣父之歎猶及闕文有子長之才乃稱實錄

國家建明天載以賁大猷招致又英茂充秘館磨研編削盛東觀之游供帳餐錢抗開元之體罔深道訓曷宿官成顧茲畫餅之名超據采薪之地諒緣外獎方玷榮階斯蓋伏遇閣下均愛彙茅助封茆械務英才之樂有味其言極薦寵之私豫爲之地假冷風之末力塗斷木之繁文密導茂恩俾加無狀敢不懋明乃志慎伏攸箴遵道以行惟書盡信靈龜自守潛戒于朶頤鳴雞有晨不愆于如晦庶逃司敗罔忝知人

景文集 卷五 參政侍郎啓二首

伏蒙執事以和叨秩省闈特賜手筆垂諭長跪申誦以榮以惕竊惟紬次大典淹久彌年終篇程御功先總領先達樂育宗工獎成收錄餘勤施及無狀第賞之冊竄名其間不稼取禾奚堪于此冬曹妙選誠如來誨但昔光德舉官由才重今承人乏任與望輕景行在先踵武增愧資材素稟難乎勉彊姑勵蹇拙不隸刑書結底本根有望于此卑情無任佩荷之至慶幣申沉已具別紙敷敘謹手啓附還使布謝不宣

翟邑之別倏焉華歲雖實輔櫛驛宿昔傳達金玉嗣音係道實來然凝素中蘊未始爲釋者良以風聲在聽不
如音旨之密也嚮蒙手教適會卧病移告不偕時答故以爲恨再得題訊甫屬有痊昏矐涸思未任牽勉修謝淹久政由此耳矧君侯雅度多可寧嬰僕以筆臆常儀哉承贊畫有裕日休厥問而獻文在旦方傾竚于南闕之前願益自愛究榮圖而承俊範也不宣

回晁參政啟

伏審顯被制榮恩聯宰政伏惟慶慰恭以參政器函道奧業總天常膺旦暮之聖期踐凝嚴之世職含光弗照

求福靡回卓爲高風旣布輿議嚮者密銜使指臨訊軍
謀擁車傳以適勤會台庭之僉錫宸心素定恩策前頒
逮此清明之朝趣對延登之寵尚聆秉德未卽當仁申
雅奏以讓還在公函而敷諭欽惟褒命久協朝言望改
素懷卽符羣望銜感欣竚萬一罔宣

代回宋參政啓

恭惟參政志懷隱正履尚淹華契賢運以露才館謔文
而徇國十行深厚抗寶訓于楚珩三接從容藹詳言于
漢席茂昭公實克厭辰猷帝實簡心邦斯詔德果近陪
契歡瞻

回程左丞啟

比者執事茂將明命近撫輿藩涓日惟良班條云始上
風甚樂聊資造適之宜河潤有餘方竚帡幪之賴敢圖
謙損亟枉誨音紉邦範之有儀敷感矜之多緒永言申
誦敢忘中藏獻歲方春趨風未日慎持齋疾用副眷懷

盛右丞問候啟

伏自執事均賢樞筦改秩臺機茂選奧藩聿開尊府方
春臨境班寬大之詔恩即日食和又神明之錫祚欽惟
著範夙係人瞻雖四國于宣聊資于邦殿而六符相比
遲正于乾台由黃霸之治功啓平津之封冊仰祈晏處
務嗇粹真顧舊物之惓惓遡餘風而叩叩乃心攸向黜
翰匪宣

上壽州張侍郎啓

恪守魚符悵懷鳴閣嘗擬中軍之義府得瞻天老之台
華坐遡三洲邈成千里茲者侍郎緣漢章之代損天鉉

之崇敕記室以授辭付行郵而垂問大丞相之重遂屈
移書一逢掖之卑敢煩鈞禮餘波沛潤幽谷蒙暄諒緣
拜賜之階前敢知歸之地感慙交集拙訥難宣

上內閣侍郎啓

儂焉孤生庇于大賜恩紀踰分年所寢多均百穀之仰
成殆一天之絕擬固當時上咫尺之紀參侯門闕之斯
奈何日力中疲官常外鞅鑿未成而氣耗瓶已挈而知
空凌違發藥之言自取有皮之慢瞿然內熱悅爾神馳
恭承鎮靜之餘允膺方穀之賜伏惟內閣侍郎道含崖

畧行絕町畦據百行之樞融其素履御萬物之馬蹈乎
大方躬易退之一辭取不回之五福偃息爲樂寬柔用
彊樹之清風式是南國然而侍從之事固有待于嚴徐
出處之宜必參行于夷惠二官圖任三節行趨願昭體
于當陽益緣經于慎夏奮庸所屬橫目同歸傾埃衰衣
之來再望簾帷之末禱悰兼萃弼翰匪宣

賀參政侍郎啟

伏審光奉制書進知機務伏惟慶慰恭以參政侍郎函
德之厚剛中而明旅力四方寅亮丕續邦被風教用鈺

民瞻天賜耆明俾輔王室果咨魁壘之彥入佐調燮之
宜追鋒疾驅前席延拜揭日當午物無斜陰推雲崇朝
澤有餘潤赫蹠行下薦芻胥歡和方守塞防側聆恩冊
振禱私喜調府莫諧

回泗州知州啟

嚮緣持橐懇乞爲藩蒙大度之包荒俾孤生之從欲汜
茲卧治正謂藏瘝敢冀執事推謙下之私布恩勤之誨
候及疾走墨妙前揮安秋帶之危懷露寒松之晚節靜
言銘戢迥邁等夷一水通流六條異守晤言未日悃素

增勞

上杭州將等諫啟

昨過都之辰凡五月始得手教承以便時止官下福祚
蕃衍甚休然音容緬邈涓悵參積雖玉音滿紙瑤華在
前而心府精蘊疇能宣其一二也希魯舊得雅望治績
雋聲出爲方國翰垣入爲吾僚異式樂瀕鄉部遂丐郡
麾然朝須老成治有連最雖爾靜勝恐難滯留宜專舍
冲氣顯介眉艾副前席之延拜云秋暑猶劇加進常膳
齋仗回占答不盡萬一悵悵

上益州程密學啟

茲者足下改擁恩節移總使藩近職增華宸眷加等洒
然衆望協于至公蓋治績久升而雅望滋重是以掩西
南之輿付明哲之才風行令先雨浹恩始想便飾追薦
抗飛旛徑鉤梯啟雲幕則中和袴襦之詠尅日而至上
都矣但春夏之序次舍少煩千萬慎齋荷集純祉謹手
啟通慶并詞動止

上蔡州韓諫議啟

承以盡言觸宰相出守近州初聞之甚駭悵俄而釋然

古之人當官而行亦皆如此堅車大皃不能不小留却而後臻于所趣也雅懷想以此自慰但暑熱館次少爲勞煩矧素簡上心當不遠而復慎護齋疾

致韓果州啟

官次所限不克與故人一交臂爲樂挹挹奈何殿中趙御史來稱盛美不容口以爲治狀爲東川第一聞之不勝欣慰今世龍虎酥酪舉集足下之門顧不盛哉慎調寢饗以迓來寵老夫蒙免無他荷庇不淺感戢感戢不宣

回資政李侍郎啟

茲者執事亟上囊封願還機柄伏蒲間請當宁動容緣高節以重違藹朝言而胥仰睿襟中眷恩數具蕃進通殿籍之華升貳天卿之峻功名弗處自安利往之常荃宰相期彌見親逢之盛流風所泊偷俗爲敦輒冀謙懷俯貽公翰味辭條之敷衍激心術以銘藏矜式所深文陳非叙

代人求薦

周升俊造美王國之思皇漢舉賢良下公車而深詔所

以辨官才于天府建首善于京師綈槩具存簡編可復
驗文王之頌多士以寧攷史班辭之得人爲盛萃茲茂
典屬在昌辰國家滙璧沼之淳流紬鴻都之清議蕩百
王之季舉三代之英頓天網以該賢掩珍羣而顓俊發
策三道許人事而直言馳傳一封命計偕而續食鳴騶
入谷振鷺充庭旋屬宣室思賢金華嚮學深念舉鄉之
制頗乖責實之文亟詔方州精求間傑苟匪挺橫秋之
茂操秀突弁之環姿擅響天球聯華序寶則何以垂光
闕里豫五六而舞雩擿藻漢廷冠三千而削牘必資鴻

碩方協選掄如某者牆宇非高風流素淺魏人持帚字
徒費于千金越俗彎弧近不踰于五步徒以幼聞令訓
長襲素風食熊掌以未多方思慕義啖牛心而素少妄
冀知名躋蹙窮途流離雅節入崔公之篋深愧家人帶
倪掾之經但期都養頃歲濫巾俊乂接武澤宮勵武城
之牛刀方謀必割弭街亭之師節遽拜先登撫昌志以
無成慟良辰而將晚揚雄素吃徒自取于扶疎韓信少
貧分無求于推擇沈冥散地游泳太和蓋內省以甚明
亦歸飛而有素時或月園遺蓋煙驛披文廣絕交之篇

尚思抵几讀課功之令幾至廢書實因感慨之時頗負
 飛冲之願然而東家歷聘非無載質之勤馮異責功未
 舍收榆之志誓驅鴛緩仰綴翹英今則充賦匪遙追鋒
 盡在人言可畏有同抱玉之家文士相輕蓋甚鑠金之
 數深惟叢陋最在孤平愧居多謗之間靡有先容之援
 陳琳奮藻况畫虎以非工邢邵干時恐無風而自落永
 言孤藐宜惻眷憐閣下俯念頑疎曲施全度借一言于
 華袞潤九里于靈河或因筌緒之間少賜青黃之飾則
 雲駕之馬倚千里而可求失旦之雞庶一鳴而為効發

身奮跡不自他門卑情無任激切待命之至

鎮府謝上任與兩府啓

茲者祇循詔旨惕服官箴引組揆榮捫襟擁愧伏念神
 學非企古知不逮人向丐冗閒本藏衰晏材短多負志
 小易安不圖朝僉誤委邊劇護師萬眾綿地六州遇事
 得便于宜勉行輒進其秩中軍攝總誠宜卻穀之長年
 列將稟承叵如倪寬之懦武又况數奇者罕得如志貴
 實者尤難副名審計孱疎交塵受授所賴下官道包子
 廣仁益乃疵被菑壤以蒙春穿部家而引照鬱為華寵

庸賁孤生尚圖軒輊之能無恩平鐫之誚州符在手賓
閣馳魂溯戀所并鋪宣罔逮

益州謝兩府啟

昨自是武軍彼去年八月詔書改吏部侍郎仍知益州
以今年二月二十日到任訖守邊無狀易地蒙褒任非
值材寵實浮願卽趨治所祇服彛箴伏念祁本以屬文
早陪禁籍後緣學政稍習吏條向詣朔郵臨總師節辭
窮一鄣之守衆爲寒心語踰三至之多每蒙辨謗戎瓜
四熟領雪徧紛何圖幽黜之期更忝驟遷之幸天卿貳

秩坤絡巨藩寄任光隆倫輩歆羨此蓋閣下財輔丕緯
謀熙庶工含容予取之求成就汝諧之往矧蜀歲豐足
益士文柔法令謹嚴盜賊衰弭雖率愚短可及靖嘉但
身遠者心危驚禽有以虛墜援寡則讒勝楹木爲之先
殫敢丐大鈞終全一介班春方始詣府未辰榮感所叢
訥澀非敘

上都運待制啟

伏惟雲章賁宇待對列于清班星昴分街調食歸乎雄
部聿參盛選允屬兼資都運待制閎器雅材清規茂識

早協邦華之望游登書伐之成簪筆繩違矢嘉言而罔
伏操籌質簿衍精計于無垠克協公僉遂光禁路據兩
河之曾悉委于均輸沿八使之名更資于澄察適聆來
譽增仰末輝敢謂謙私首詒芳問書藏巾衍非替卽日
之榮訂況松筠更識他年之舊庇陰有所論感無倪秋
物寢衰道腴祈勝自餘馳想焉足容聲

上淮寧知府待制啟

協守官經坐叨廩稍志衰學落年長病侵非無恩紀之
隆絕修書聘之謹良以道機攸照容有江湖之忘夙契

所諧不煩膠漆而合帆緣至眷敢擯藝儀待制允蹈大
中孔甘亮節危言滿于臺閣嘉績最于藩維氓頌轉聞
朝謀僉棄方且進撝德柄俯眷儒紳占鈴史以布辭戒
候及而齋況蔚如翠柏自凌歲律之寒愛若青氈知是
君家之舊內惟刻誦永誌褒憐夷道右馳孤誠南注願
保春塗之祉助嗇天倪之和傾況于茲一二非列

授待制謝兩府啟

比者被獎中宸通班祕宗衰甌匪序榮灼參懷竊念祁
祐薄早孤學勤晚就雖謀干祿止辨易農寢簪紱于朝

閨間磨鉛于史室自忘其鄙日慎乃修升直殿螭之坳
入贊牢盆之計車鼙鼓鳴能無失性之憂燕麥兔葵正
恨取名之過漸圖寡悔少贖空餐敢冀穎卬曲垂眷逮
因避親于具爾不緣進于道司直寘邇聯專由睿擢在
人畏假卽受慙虛矧茲華閣之嚴號爲規地之密字文
成葉羅綯于珍圖奎勢如鈎上儀于寶宿詎應完士入
備王僚跡夫誤寵之來抑有爲容之素此蓋閣下助陵
敷育因埴埏和謂鳧鶴之異宜俾罇盧之參使遂容昭
世蔑嘆滯才方且疏淪乃心靖恭爾位倣攸箴之所服

戒求福之斯回庶息煩言歸酬至鑒被巾禱而尚遠寓
筆舌以奚宣

同密州孫龍圖啟

一昨內閣學士避榮辭禁就偃侯藩戒東方千騎之嚴
盛顯父白壺之餞奉將使節兼過鄉枌交相如牛酒之
懽驗北海門閭之大茂遵吉日臨布寬條暫厭承明之
遊非勞侍從莫如韓士之樂聯便養頤況敦簡在之懷
難駐斜飛之勢遡風方切貽訊見存寘右座以昭銘款
東雲而增黯春祺茲始時養由加

引卷啟事

談彼上林雲夢之游蓋寡觀乎滄海冰夷之室已卑况
有歷造師崗上攀雋軌席陪珍之聘焜照宸猷嗣烝汕
之賢彰施國體誠非間傑曷竊題評如祁者漫漶學疏
迂愚智短有門邊之骭髀徒取世譏乏竈上之掃除終
非時彥徒以幼專童刻長頂師鬢眉體不勤惟書盡信
探二儀之精奧採六藝之潤芬曩以多難亟鍾先芬永
謝窮愁萬斛淒入肝脾故里一塵鞠爲禾黍撫箕裘之
弗競瞻丘壑以何歸藐是諸孤勉親編削披龔聖域刮

自翰場祝揚子之殫蛤但期速肖執中黃之賤虎幾嘆
固窮伏遇國家祇迺鴻靈若稽輿訓盡仆威械專講教
文三世在天二宮闡化坐鼈庭而訪道程夜石以觀書
深詔方州詳延俊選公車之府自鬻者千餘園橋之門
觀光者萬計洪惟丕烈卓冠常均是使採樵之夫率談
王道擊轅之鄙亦次頌聲獲陶被于餘風每游揚于素
蘊時或過秦抒論探穴求書勞者須歌登高以賦孔編
顏適概覽于舊聞楚謠漢風潛抽夫餘韻諒非善著頗
近木強積是歲年盈于巾衍然而壽陵步蹇殆匍匐以

都忘長沙舞卑幾迴旋而不足樂材增散榆思益瞑率
小子之斐然良乖詠嘆當主人之道爾合在詆訶幸遇
閣下粹範丁辰懿文華國愛兼墨翟道廣太丘樹風鑒
于往圖聳人倫之先覺祁是敢洮汰常累呈露庸音綴
邦彥之下陳備貢條之丕式藻繡攀悅寧助于采章唐
突與璠自知其固陋伏望鑒茲平進導以先迷辨驥坂
之長鳴助泚莪之樂育因雲洒潤沛發于餘波擿埴索
塗俾進于遐武煦之暖律激以順風重念爲文相輕傳
之自古入門各媚孰肯爲言藁爾孤生最云單跡抱玉
之家甚衆鑠金之口可虞敢祈護短之仁終賜援沉之
惠許鑊錡之有請冀豫神兵爲枯木之先容將成國器
方塵觀採彌極怔忡

上青州相公啟

伏念阻侍台儀遽殘冬筦液櫛戾質尚廁華光之筵蓬
曲寸心時夢翹材之館惟偃藩之甫爾介嚮福以咸宜
閣下感會三儀昭明百度詳言順采爲有國之金湯正
色端朝失羣邪之倚著勒經大政辰告遠猷是以首封
蕭何比之左右手目送周勃謂之社稷臣丕績克咸常

均絕擬頃緣冲遜之雅重茲勞勩之均特開千社之封
聊罷萬樞之柄訟棠所茂先梓具存富貴而歸故鄉前
夸漢牒股肱之衛元首終輔舜圖冀嗇道冲上符天載
紳綏所詠坯冶攸依

兼龍圖謝兩地啟

奉中書劄子以初三讓便令投告敕者丹訴數聞成音
三卻願孤易奪恩重難違伏念初年景頽侵才力衰鈍
召自西蜀歸領計廷屬有內避之嫌尤滯官聯之總蒙
便私請還授故資仍因進藩更帖新職但素願已獲舊

物盡歸又取美名實同詭遇瀝懇雖苦收渙莫能惟令
出之必行終降拜而升受此蓋閣下導仁下濟俾物曲
成忍多取以非廉畏罔功之求比誓勤夙夕冀報涓分

景文集卷五十六

景文集卷五十七

碑

宋

宋

祁

撰

復州廣教禪院御書閣碑

復州漢竟陵地五代晉時改為景陵祁才傳

釋褐為復州推官當在天聖三年碑云
乾興 王意建閣在前碑文在後耳

昔者上帝冊書藏羣玉四徹之府神禹祕記著南方會稽之山若乃上聖蔚興含靈皆警彌文塞天淵之表遺章倬雲漢之象温瑜鏤翰崇樹規獲協三五六經之制藥函真本頒貺方國鎮七千神靈之封用能蔽穹壤而

相傳存都邑而有副鼓之而天下動舉焉而能事畢嗚
嗚勞勞而珍圖焜照在在處處而神物護持者歟復州
者古爲景陵郡棲地敞夷殖物繁夥濱帶江漢嘗被文
王之聲詩蔽虧宿莽流爲騷人之悽愴神姦物厲之不
作民風國教之在柔居然吉祥是鼓殊勝直城西出一
里有院曰廣教乃唐禪師積公之經始大士陸生之攸
踐巧歷之算雖往故府之求多在邑并不改寒泉漱玉
而仰流岸谷相爲洪碑生金而未泐肇爲寶所垂乎百
禩觀其面勢盤據標勝呈露卻背平野前瞰大澤屈到

嗜芟之獲產幽流不穢長者揮金而側布檀施嗣臻佛
事具足以莊嚴都人讚歎而踴躍真宗咸平初遙追來
孝執競先烈紬禁中茂陵之聚備天下名山之藏乃以
太宗皇帝御製御書凡百軸下賜焉照之天光震動沙
界成鈎之文煥布辟惡之香芬郁霧圖蘭葉蓋天姥之
嘗窺赤水珠胎非象罔而誰得乾興元年景陵縣中譚
顥內發信誓謀就 帝捐緡錢數十萬建爲重閣遷賜
書而藏之木摩而匪彫棟隆而弗撓鳴聳斯飛以異狀
陽 如舞而四承巍乎覺苑之增雄凜然天魔之潛衛

奕奕雲構瞻咫尺威而如在灑灑宸懿賜書文之一同推
而上之思議安及者已先是天禧中長人邢公若思以
寶坊雄峙睿篇申錫非大精進疇克奉行乃以僧惠嵩
爲傳法住持并幹院事未幾嵩引去又以今釋長老智
昇次補其位一滴清淨之流演普及衆生四事畢給而
薰修雄成內院原乎震旦啟大千之界皆爲淨土而積
高之陁或明神之所憑賢劫示百億之法待付國王而
大事之緣有諸聖之時現帝華撫運筆舌乎五教而大
墳常典傳歸乎東序之秘寶宸極繼志粉澤于先業而

冰綃壺墨分藏乎不死之福庭蚩蚩之氓含甘吮滋迷
帝力之所及沈沈之宇子來勿亟歸天保而在茲俾是
書也竝日月而麗乎天斯閣也以香花而散其處射者
不敢西向如畏共工之臺從昔未曾得聞更同如來之
藏神宿官甫邇落成斯覲淳濯至化頌次成功銘曰
寬柔以教兮南方疆神明來舍兮壽而臧崇建塔廟兮
最吉祥聰睿撫運兮臻太寧雲漢章天兮奎鉤明名山
大都兮闕文經瑤函珠笈兮敞層構弁勒湯盤兮垂不
朽當來下生兮齊佛壽

成都府新建漢文公祠堂碑

蜀之廟食千五百年不絕者秦李公冰漢文公翁兩祠而已冰爲蜀鑿離培逐悍水以溉所及常無旱年西人德之因言冰身與水怪鬪怪不勝死自是江無暴流蛟蜃怖藏人恬以生故侈大房殿歲擊羊豕雉魚伐鼓嘯簫傾數十州之人人必侍祠奔走鼓舞以娛悅神祝以傳嘏而後敢安公之治蜀開學校以詩書教人澡熨故俗長長少少親親尊尊百姓順賴其後司馬相如王褒揚雄以文書倡張寬以博聞顯嚴遵李仲元以有道稱

何武入爲三公漢家號令典章赫然與三代等蜀有儒自公始班固言之旣詳初公爲禮殿以舍孔子及七十二子之象殿右廡作石室舍公象于中晚漢學焚有守曰高朕能興完之後人又作朕象進偶公室歲時長吏率掾屬諸生奉籩豆饗醪薦之于前虔踞謹潔一再奠而退辭無敢不信焉冰以功公以德功易見德難知故祀雖偕而優狹異焉嘉祐二年予知益州往款公祠至則區位湫偏埃蝕垢蒙不稱所聞大懼禮益懈忽神弗臨享其明年乃占學宮之西改位鳩工弗亟弗遲作堂

三楹張左右序及獻廡大抵若干間布尋以度堂累常以度庭疏牕以快顯壯闔以嚴閉采有青丹陛有級夷瓦密棟彊若棘若飛乃肖公象于宇間繪相如等于東西壁本古學之復莫若朕本今學之盛莫若故樞密直學士蔣公堂故繪二公于宦滬皆配祠焉于是擇日告成于神揖而升簋笋果滫脯脩紛羅而有容可以告虔趨而降罍罇巾洗席燎竝施而不風可以盡儀相者循循任者舒舒禮生于巖廣靈安于閭寂故也噫自公之來蜀之人自視若鄒魯宋興名臣鉅公踵相逮于朝先

帝時巨盜再作亂弄庫兵爭劔閣是時蜀豪英無一汗賊者羣頑愁窘不容喘而滅非人好忠家知孝使然耶所使然者不自公歟傳曰非此族也不在祀與公在之矣則是祠之作願自予而古無俾壞息云祠之與同尚之賢則轉運使道抃及提點刑獄使者凡三人贊輔之勤自通判軍州事祝諮以降六人營董之勞自兵馬都監毛永保而下二人咸書象于西廂列官里于石陰銘曰

公二千石兮守大邦冠峩峩兮紱斯皇出有瑞節兮車

騎羅石室孔卑兮人謂何新堂翼兮耽耽庭廣直兮序
巖巖吏奉承兮不諱神來徙兮此其家儼羣賢兮竝陳
公所教兮如其仁庖魚挺兮俎肉鮮神來享兮愴冤延
公教在人兮無有頗蜀賢不乏兮才日多俗祥順兮孝
慈公祀百世兮庸可知

楊太尉神道碑

慶歷二年春二月甲子詔書故太子太保致仕贈太尉
崇勲剛純義勇任重效顯有不懈之亮能斷之彊其造
謚曰恭毅申命史臣祁譔文刻石且俾螭首龜趺如令

揭著墓阡馨香無窮臣祁伏念天子所以褒禮大臣隱
悼幽顯霜遷樹拱猶無已時沈恩念忘漏入九泉受名
節惠不使有司得預雖礪山于廟固功臣之誓謹輦在
廷深將帥之思始終感會未有二茲者已敢拜手奉詔
紬繹功狀掇其功瑑于碑太尉姓楊氏字寶臣系出宏
農支裔熾昌載質四方旣貫燕薊世禪武力曾祖方道
任狹豪邁仕後唐高選涿州刺史合姓寶氏祖守斌善
射御以曠騎從太祖爲龍捷指揮使授室孫氏父全美
志勇決器安重扈執衛戈山立雲從終殿前指揮使左

班都知委禽王氏竝涵淳陰德益久彌大發越網緼歸成後人公旣顯率禰而上贈太師中書尚書令由祖而下封鄂國公推妣及曾分胙楚韓秦爲夫人國太尉事兩朝歷二十八官其最著顯者由彰德軍節度相州觀察留後領振武鎮南定武山南東道河陽三城五節度以留務歷殿前都虞候侍衛馬軍副都指揮使以節度爲殿前副指揮使宣徽南院使樞密副使樞密使再同中書門下平章事守陳壽毫鎮定五州兩爲河北兵馬都部署皆國家腹心柱石天下所以安危者故上欲左

右有民惟公之爲若鼎彝然所處而重若金湯然所恃而安有牙童童有印纍纍以勤以庸元首是毗舉當世賢臣魁壘骨鯁之輔待公而足公幼時以門廕事皇太子宮太子訓之學因通書記刀筆絕不熹狗馬弋獵事痛拆節比諸生在左右謹力自將未嘗以孰何見謝皇太子卽位是爲眞宗皇帝自東班承旨十一遷爲內客省使由恩州刺史三進兼桂州觀察使公旣藩邸雅舊故敢言無所回隱每使四方督盜賊采風俗還奏有條帝以爲才其後數訪羣臣臧否切問邇言世祕莫聞時

時有所建明帝未嘗不稱善更莅內司風績流聞當此時益親近出入光寵同時等輩皆不敢抗茵憑几天禧晚年貴臣投隙親置黨人擾既端于時公聯掌皇城密以情告厚利盜言或陷或訐公卽計策其詐念帝久未豫今上居東宮若放命竊發謹勸禁省雖食其肉奚足償耶卽日白發其謀魁慝禽伏撲燎未然折蠱始搖保安宗稷繫公是力上自先帝時旣聞耳矣及纂嗣遂以爪牙任之居中軍上將風力銳甚視巖廊整整而虔足和門暨暨而安星落慢省居衛行護朝廷雄尊得公愈

明久之進貳樞務章獻明肅皇后嘗曰公謂上曰是先帝所謂忠孝者用未及顯庸有待耶于是由第四署超正使席會權綱有歸政體清明萬樞叢遠皆從臨決公心經大猷膝造昌言底行將順甚稱上意明年使罷得視丞相秩卽淮陽開府仇家便文誣列曩寃執事間之因以釋憾有詔罷宰職公一不目辯將命之藩責言靡讎事久益直示篋食隄終蒙簡照歲餘還治宛丘北敵丐盟使者結納未能得其要領于時以傳車召公入議至則贊書已具若曰爾復以相守印博陵如漢灌嬰故

事凡兵在鎮定者爾皆統之公頓首陳謝退條禦戎擇帥邊鎖所宜急者數十牘以聞謀謨卓詭乙夜被賞乘轅北驅威先令行化劬爲忤甲壽馬良士奮于行未幾徙常山今宿帥王相國得用代鎮博陵與公相犄角當一而諸將皆以兵屬師和帥賢敵謀益伐會戎譯講解兵悉罷屯詔公入鎮圍田前此以壯趾之苦方事未寧不嗇有加至是固辭不拜上言疆場少間幸得歸節闕下丐骸骨還丘園朝議重違故制授左衛上將軍聽老明年冊拜儲保俸如居官乃薨享壽七十于是歲在大

梁閏五月己酉嗚呼公以大有之健中庸之不倚書之攸好德出屏入輔文武是憲適居成功休不待年其所以經綸黽俛者卷納靈府完爲和氣宜艾且祺屹如岡陵而遂溘逝蓋曩之瘁盡與今恬泊不相補歟或化者自有數得正而歿賢所樂歟此上所以聞問鯁傷臨茲廢朝錫賙係路厥哀照室者已公爲人有崖岸識詣精明居常觀圖史博古今辯論感槩森如矛戟善爲政摧勒豪彊苗薶髮櫛不使敗類初羣牧制置使悉雜擇臣領之所以佐縣官經馬政獨公由監司至使任無慮九

景文集 卷三 九
年廐校數充蹏將不乘及在殿衛二府亦八歲不他遷
勤官善職見倚于上乃如是質所樹立固宜有大者焉
厭難未萌先事電發勇之果也華首詣屯初不辦嚴忠
之壯也蹈道引年牖下歸全仁之固也假令陽秋可作
尚珍且貴奚止載太常之繆鏤景鐘之樂哉娶夫人王
氏姚氏田氏不偕公老生子十二人宗讓宗說宗
誨宗識宗謹宗諤宗誼宗諫宗詒讓爲內藏庫使
說內園副使閣門通事舍人誨內殿承制識諤諤竝內
殿崇班諤誼諫詒竝東頭供奉官詡識諫早世諸子雖

食舊德皆能以才自顯于官洗洗也知公義方世濟厥
問烏可量已薨之年諸孤旣辭詔葬則自發私稅與過
筮謀得秋八月壬申克葬于開封府祥符縣鄧公鄉齊
公塋之子位夫難泐者有如石不朽者有如名行遠者
有如文且王命焉顯揚懿烈由行遠旌不朽託難泐以
示方來則公之系之才之伐之官何千萬年而有泯焉
銘曰

古人之勇撓于爲利公聞悚言據正彌厲爲君督奸羈
辟狂猗爲臣之忠哀于官成避劇就安以保其盈方事

景文集 卷之三
之難公乃奮行功名之際賢者罕處節整位隆公則引
去是是非非定于闔棺卒葬恩褒邦靡間言青史有傳
公列功臣宋門有閔慶垂後昆梁旬昀昀汭流渾渾不
遷不腐茂烈偕存

范陽張公神道碑銘

公諱蘊字延纘張其氏也詩春秋以來爲顯姓胚德及
祥代有其人惟公祖諱從實值石晉亂自范陽遷齊州
相地授田放志林壑惟公考諱光文能紹厥訓以萬物
爲細不足納胷中與道頽靡弗引名自近再世不還葬

故公遂爲歷城人惟公有子曰揆貫之曰揆文裕皆名
重當世貫之以給事中入翰林侍讀學士文裕以兵部
郎中充龍圖閣直學士由是累贈公禮部尙書夫人王
氏清源郡太君葬奉高鄉之黃臺里尙書之墓龍圖閣
直學士天水趙師民爲之誌尙書之行琅邪王彭次之
狀文裕以尙書品得碑神道焯寵賁幽乃藟緯石屬予
以辭予官吏官不得讓謹按尙書少明悟以隱正自將
事親瞿瞿惟謹與朋友信風義崖然雖服儒衣冠無腐
儒氣視功名若跬步可取者太宗時廷陞間將命皆欲

得雅才尚書始應選籍殿前承旨監冀之衡水稅舒之羅源茶官稱職改換三班奉職以左班殿直爲環州馬嶺兵馬監押改左班選爲淄州兵馬監押以累免官權置壽州俄以三班借職召監大廣冶大中祥符四年夏六月卒于官享壽五十六羅源茶歲入鮮而置吏專司尚書身得其處不敢安上言願省冗員以茶界通判軍州事兼領詔可故得馬嶺馬嶺瀕邊人皆書負韃夜燒烽以強力相賢未嘗知禮義文儒尚書始與孔子祠日召惇老可人語以詩書曰習是可以爲慈父爲順子爲

悌弟爲愛兄遷善革頑弗犯天子法衆皆喜曰公不鄙我我敢不從悉遣子弟學祠下自是邊俗一變文人爲刻石著功在淄也方咸平初契丹擾趙魏乘冰壯游騎度河關齊魯淄人駭舉將走山知州事者乃議縱之欲身亡去尚書扈譙闔怒曰縣官財廩咸在壕堞尚完一去此則強弱凌暴敵未至我先敗矣敵知我有備敢過而東乎按劍橫膝曰有出者斬知州汗額羞恨吏欲戰尚書卽治戰具浚淺增庫守氣毅然後數日敵去由淄以東按堵自若衆相語微張公吾等血丹野草知州儲

前憾陰攘尚書所計爲己功白于朝會使者按狀尚書以實對吏惶怖共劾尚書妄言不讐請下獄遂連年不能決尚書訖不自明故下遷文正范公仲淹少客淄知尚書甚詳常謂今之士欲輩古人者惟尚書則無愧慶歷初經畧陝西至馬嶺見所謂孔子祠者咨歎久之美始興學并推明責守城事凡作文數百言瑒之石陰文正不輕許可人其實錄自視司馬遷比故士大夫知尚書忠且賢益明白不疑尚書好擊劍射御推步醫劑罔不善賑贍姻宗弗爲家有亡計也其訓子非仁與義弗

寘口授之學未進過時爲不飯已進乃嘗故貫之文裕由滕下日奮勵至大成竝擢進士第貫之性鯁亮行已峭潔階級已遷不肯作沉浮事年五十餘宰相薦明經術及所傳揚雄太元上召見延和殿問所以準易者貫之對雄所言不謬于聖人又詔撰著作首其繇獻吉上喜翌日拜天章閣待制兼侍讀數因吉以諷擿筴曰某事善今可從某事不善今可鑒上恣聽之無厭旣退無半語及省中故人鮮知者文裕性沈懿最能文辭外和遜中剛固弗可屈名臣鉅公爭從取之出門下章騰

辟竇元慶歷間西戎僭亂文裕從大帥經制故事調軍
興策彼己尤悉常爲一府冠後雖帖職集賢殿朝廷每
以劇任之自三司判官再爲轉運使又以至成德軍領
本路兵馬都部署安撫使鉗吏紆療民瘡權鹽鐵用度
護西北勁兵處剖決精敏無留疑言儒而材者文裕爲
兼之其得君其任重肆大厥猷故未艾哉清源之喪與
貫之跣以送柩時天寒趾皸瘃不置路人皆爲流涕嗚
呼以尚書卓行健明不推咎咎人引利利身知有子爲
之後也以貫之文裕蛻布衣入金門玉堂交武在天子

左右知有父爲之先也此而不銘尙誰可銘辭曰
孰如公之時才不克施孰如公之才不幸而災孰如公
之報熾豐厥後孰如公之榮漏寵冥冥揭表于阡鏤美
青完請視子孫俾信斯言

張文懿公士遜舊德之碑

惟宋四葉天以端命付皇帝旣社南邦乃建元儲始御
資善堂參聽天下事真廟委成羣臣遵審訓奉土國寶
皇帝卽位重光合華道益大興天燾地持罔有不承惟
其佐曰清河張公由戶部吏部二郎中直昭文館爲壽

春及昇府諮議參軍以右諫議大夫歷太子左右庶子
進樞密直學士爲賓客以樞密副使給事中領詹事出
入兩宮實輔實維逮潛而飛神攄景發首狃天極上之
六年制詔有司先帝遺朕寶臣曰士遜毗亮厥初勤勞
我家外經內幹聲烈嘉鈺有德不酬朕庶幾焉爾惟相
且類台德前此公已三遷爲尚書左丞乃以禮部尚書
中書門下平章事分執政事筆于是綱紀文章張設修
明公與二三臣協恭濟虔風力銳甚因其故而奉行之
本其宜而財相之所以鎮浮扼動便安元元之道其備

翕然號稱職相故樞密使曹利用素貴強宗子留鄉里
使酒不軌旣具獄或謂利用竝坐上疑以問執政衆噤
嘿相顧望公徐曰利用大臣宜不知狀獨不肖子爲之
時問語先入利用得罪公以議不合罷爲刑部尚書知
江寧府宰相文正王曾亦爲上別白曹事終曹氏復爵
土還所籍產官其子孫居二歲朝京師以檢校太傅領
定國軍節度知許州踰年用舊官復入相進中書侍郎
兼兵部尚書明年上專攬萬務除門下侍郎仍前官遂
總魁柄未幾以左僕射保留西雒時楊崇勳亦罷樞密

使以帥節兼台司同謝殿中班在公右帝憮然悟明日授公檢校太師山南東道節度以宰相秩復守許昌公不以漢相尊廢事事爲政有體不曲折煩苛時時方畧縱舍有足觀者賦更在民類先與期故所到皆有惠利仁愛築大隄環城以障濼潦瘡積燥完戶免墊愁許人蒙休鑿碧頌功移判河南府久之上推雅故復進公爲上宰盡還前在丞相府之領俄封郢國公公旣以年高位隆萬或一悔有不勝任之責乃七表讓還印綬面陳又十數雖上之所以拒而留者亦不勝記公執不回遂

用拜太傅進封郢國公聽謝特詔朝朔望大朝會竝綴中書門下班出入施繖與一子五品緋賜近城園一區月給實俸國朝自中書得老者以公爲初辭朔望惟朝會一再至至必上眷矚加等或遣中侍者勞問嘗御書飛白千歲二字賜公難老公因鋪叙前後所錫書九百函爲歌一篇贊成盛德皇祐元年正月己未薨于第享年八十有六翌日問聞上駭歎趣外辦車駕或言日直陛下元命不可往上曰股肱實虧日于何避遂行哭之勸賜銀三千兩布帛醪米副之以太師中書令賁其柩

進陞宗黨官若職者十有六人嗚呼公字順之淳化中
與鄉進士試禁中占對鴻徹太宗異之擢乙科調隕鄉
主簿射洪令以異政聞改襄陽令外憂自免還除秘書
著作佐郎知邵武縣轉本省丞號畧楊億在翰林高持
風鑒少所器可薦公才堪御史因授監察御史頃江南
轉運使關中書進擬輒卻真宗不次用公執政賀上得
人換廣南東路三遷至兵部員外郎代還授河北轉運
使改工部郎中河囓棣州有詔徙陽信官見糧多不可
以遷公視瀕河數州方歉食卽計餘以貸民年如納輸

入新郡振乏權羸衆賴以紓真宗最公治狀欲遂寘左
右會王府開面命公曰杖選于衆無易而才公拜稽首
遂用調護公身七尺進退安重中隱正外文明篤于孝
友根于仁愛一時士大夫歆艷成就出門下者皆名流
鉅人施予姻舊廩稍畧足不問在否幾何任樞省凡八
年後三至台輔去位又十年所遇不同而事皆可紀方
上諒闇冢司持衡排抵時望陰席權寵公居其間防檢
百爲身伴長城慮先元龜妖脂讒具無所投汙然而卒
定大事蓋乾興時善公之謀章獻佐治軒陞重嚴公事

二聖外謀必聞裏言不宜孝承慈佑鴻名雙濟及乾剛
獨奮有弗厭者一切罷免而公見留宰相文惠陳堯佐
門下生竊出上書妄言變事又有譏諫官立黨者公還
奏上前質其誣熾于是告者結三歲刑諫官事寢不下
故明道間見公之忠者德復用上方厲精聽斷公朝夕
進見一力匪懈登峻巖良緝興化條太和嘉生蒸薄滲
漉舉天下全盛視公所以致君至不至耶大抵相創業
者先功相守成者先德經綸之業易言而鎮靖之績難
知公可謂治世之傑輔皇極之全懿者已故寶元以來

著公之勞公之引年人間事一不概意閱黃老旁行書
粗以應外精以治內乘和日化與相頽靡再過鄉上冢
召故人長者散金爲壽野服巾車不自貴其貴百社蕃
并化爲康寧偃然牖下如蛻一委當此時搢紳大夫之
輩又善公終聖上所以惻怛悼痛舉哀外次三不視朝
有司諡爲文懿匪公孰宜凡附官見職者審官審刑二
院史館會靈觀判官以近臣兼之契丹國信使在藩房
時帝所特選祥源觀使以宥密領之集賢殿昭文館二
學士監國子南郊大禮使獻懿二太后園陵使以執政

莅之邑戶萬五千七百勲階極品功臣出處更二十六
號公于書史多所泚覽爲辭章深純典正尤嗜詩所得
皆自然經奇無所彫刷故禮部尚書清河張詠許爲第
一流生平編次成十集旣詔索遺藁家丞錄五集以獻
遂秘禁中信乎有德而又有言者歟公之先蓋漢陽王
東之苗裔系牒湮落世數失傳至曾大父諱育從唐本
道帥趙凝府鈞校用度奏爲大理評事凝破避兵沂漢
止均州鄖鄉道葬焉配曰郭氏大父諱裕試金吾衛長
史主陰城鹽鐵院配曰胡氏父廷朗隱約違世配曰趙

氏二龐氏李氏公能推恩以開府儀同三司太師中書
令尚書令郗楚韓三國公上追先烈以燕晉魏韓魯越
國封自妣而上五族太夫人公卽魏國所生七日而母
夫人喪屬公于姑顧復勞苦至于成立公請于朝封姑
爲南陽縣太君其喪也如母而不緘姑子全氏贈太子
左贊善大夫公娶姓三蔣黃氏追封晉陵英國二夫人
馮氏封舒國夫人四男子曰友直刑部員外郎直史館
曰友侗殿中丞曰友正將作監丞曰友誼奉禮郎獨早
世上卹其孤故友直爲史館修撰友侗任親民官友正

選大理寺丞薨之年夏四月癸酉克葬公于河南府登封縣天中鄉之原英舒二夫人祔焉諸子以敘公之業有故吏狀節公之惠有容官議冊愍于朝誌埋于幽奏終藏事無不如志惟絳石魏存可刻以磨若又著庸其上顯據無窮誰不謂然乃請而命史臣和繫以詞曰
惟天興雨有雲歆蒸惟辟撫期有賢挺生賢者謂誰英英令君竭來于朝對我聖真帝啟南社實護且毗旣在東宮陟降不違帝受冒珍瑞福紛綸頁日當天四海復晨內經鴻樞帝心以嘉三陟宰司并秉將牙公之在朝

施設有方百工儀儀莫匪峻良公之出藩八以阜安黍稷熾豐靡厲靡忠固牢歲空吏不傳爰老還第家爲國傳臣班視台鉉寵光益振陶天之和用克永年未始疾憂委化而壇帝嘆愍遺行不便時殮以袞章歿軫餘思凡公猷爲一代宗臣有勛在史有德在民昔周之爽佐成以功叶振權綱王道邇隆在唐之說輔明以嗣擁全威靈大猷訖濟公視二臣孰爲後先著辭表阡風烈永傳

景文集卷五十七

景文集卷五十八

誌銘

荆王墓誌銘

宋

宋

祁

撰

慶歷三年冬十二月皇叔荆王疾病辛丑皇帝輦如其宮見于卧内禮如家人上手為調藥王泣且謝即陳被恩三朝無以報厚德今保首領仆牖下倘使有知從二先帝遊死骨不朽惟以兒女長累陛下上惻然謂王素康強雖今小恙行且瘳敷近醫藥以自愛因資白金五

千兩王固辭曰幸一見天子奚賜之敢叨上高王之讓
特詔從之明年春正月乙亥遂薨上卽時臨弔哭之慟
廢五日朝壬午御素服宰相率百官詣崇政門奉慰遣
中大夫相其室以藏內事詔翰林學士臣某內侍省都
知臣守忠護其葬以庀外事制詔中書門下其贈以天
策上將軍亮徐二州牧燕王印綬太常上謚爲恭肅又
詔臣祁爾應叙王治行縷碧款隧俾永其傳臣再拜稽
首伏自念慳學扁聞不能周知王德今天子展親節終
震動顯幽自王弗寧遣太醫高手踵相及于路逮終歸

贈不貲計比葬三酹其喪則上之所以眷王王之所以
承上其仁其賢方付史氏以昭無極臣雖缺然牽綴尚
懼稱道失當爲斯文羞而日迫事嚴不及誤避是用詢
玉_案撫行狀次第其辭謹按王諱元儼太宗皇帝第八
子母曰德妃王于諸子最幼太宗特愛之終日侍左右
在宮中眞宗嗣統王年十三始以檢校太保左衛上將
軍兼御史大夫爵爲公國子曹進拜平海軍節度使俄
同中書門下平章事加檢校太傅爲廣陵郡王授昭武
安德二軍節度眞拜王以榮爲國稍兼侍中易安靜武

信軍檢校太尉兼中書令大中祥符八年宮屋火延燬
內廬坐火禁不謹削武信一軍節度降端王始築宮于
外他日謝上痛自咎責真宗嘉慰之復以鎮海安化二
帥節改王于彭冊拜太保以天平易安化拜太傅以永
清橫海帥節更王通繼授陝川大都督合保平定國兩
軍又王涇今上卽位以地尊屬近進拜太尉尚書令仍
前兼以鎮安忠武二鎮徙王定賜贊拜不名又加詔書
不名頃之更王鎮賜劍履上殿拜太師以河陽三城二
節度卽王孟翌日行京兆尹兼鳳翔尹卽軍府爲節度

乃王荆又進雍州牧兼鳳翔牧久之以國在荆授荆揚
二州牧卽荆南淮南節度爲大使仍賜入朝不趨大抵
賜功臣號者九其文至二十有四勅上柱國階開府儀
同三司邑戶二萬七千實食一萬二千四百人臣之極
攀止矣王美姿質眉目如畫廣額豐頤舉止矜重在平
居無少懈祀容恭朝容莊賓容肅宴容侃侃而中雖霞
之軒然麟之儀然瑜潤而葩鮮不足侔已事德如尤謹
每有疾焚薰請命而王進飯視如一再以增減居喪以
孝稱躬緇太宗聖容纖微克肖天光日潤若可就而望

者性開敏博覽文史好飛白書拂灑道妍結字甚工作
辭賦數百篇務求理致寡嗜欲左右姬侍裁令奉巾櫛
箕帚不受佞讒翦翦者或伺隙膚訴必正色折愧由是
內外無違言大聖以來王自以春秋高蒙殊禮不敢數
朝請常闔門申申以居會朝廷調軍興議省費王卽表
上公使錢歲五千萬佐用度上不獲已權許半入以申
王恭晚節頗好絲竹亭觀日夜自娛蓋健粹所賦必有
寄于物而后能適云始天下之言貴而親莫若王而王
乃小心恭慎在骨肉間始終無纖芥使宗室本支日愛

以敦語德與功其何如哉孫宣公旣嘗授經必語人曰
王賢王也世以爲知言娶夫人張氏彰德軍節度使永
德之女循法度膺象服承寧王家以岐許晉三爲夫人
國不幸前七年薨追命魏國夫人子四人男曰允熙右
監門衛大將軍滁州刺史贈博州防禦使曰允良鎮國
軍節度觀察留後曰允迪靜難軍節度觀察留後曰允
初汝州團練使諸孫嬪然或冠或笄問安也蟬璽襲乎
庭來寧也鑣悅交乎闈此所謂朱芾皇皇室家君王者
哉初魏國之葬也當王墓之次故卽用其穴以三月庚

寅具鹵簿鼓吹奉樟宮自京師如河南之永安以夏四月癸卯啟魏國之誕從禮而合諸墓嗚呼王之爲子孝爲弟悌爲叔父寵而虔爲父義而有慈甲子一終啟手足焉未爲頤而艾也雖然壽皇烈憑天祉駝鈕盤華餘四十年忠孝之絕光矣榮哀之事終矣銘曰

太宗九支潞篤于病昭成弗永真宗受命潤邢蘇華竝王而藩代天之工咸罔登年穆穆燕王太宗所愛真宗則之寵錫光大上曰叔父屬尊以親不名不趨劍履振振王最壽耆夾輔顯承道具美完纖誓不興癸亥之冬

冰介木披楚陳尤甚禮氛前知困而遺忠神不奪守勉訓諸子表貸醫咎上命中人悉取其書或筆或書分藏石渠厥仗火央刻章煒煒詔從儉葬俾顯王美永熙西原橋梓後先旣利旣安以佑來昆

皇從姪全州觀察使追封新興侯墓誌銘

侯諱從郁字仲文昭信軍節度使英國公惟憲之子母曰莒國和夫人英公之禰曰潭王德芳自潭而上昭穆嚴尊玉牒史官書之故不著獨著侯事侯幼悟警有志行羣居而自修佚安而不流旣就傅務學尤力臨虞世

南隸楷絕工射能命中景祐中悉召宗室觀書太清樓
詔侯賦詩應旨輒上帝稱善他日有詔褒美輦下榮之
于慶歷元年夏六月邁疾薨于第享年四十有四上爲
廢朝敕中貴人護葬所以賙含追卹之良厚留窆普濟
禪坊卜兆之未從且言懷也侯仕始右班殿直十遷至
左屯衛大將軍文州刺史爵階勳邑稱是配曰夫人河
東薛氏封丹陽郡君甚宜其家六男子世奔太子右衛
率府率世褒故太子右司禦率府率世將太子右監門
率府副率世秩故太子右內率府副率世覲太子右內

率府副率幼未名諸子皆孝謹以肥家則侯之垂裕當
有以致之者歲直涖灘始詔鴻臚啓殯卽河南永安之
先塋月舍己巳日舍癸卯克葬贈全州觀察使新興侯
禮也昔詩人之稱文王其辭曰文王孫子本支百世我
祖宗受命而帝德溥流長過文王遠甚而其支胄蕃衍
雖千萬世尚無有底止則文字之傳可以已乎銘曰
帝孫之子燾我不祉嗣而承者何千萬祀

防禦使進封饒陽侯墓誌銘

今上景祐初念雅樂猶缺詔太常攷鐘石之縣質同律

之制時羣臣多不能曉或妄以縱黍累尺改定均度上
依違未決乃自譜正聲付授樂家益召知音者以備顧
問于是左千牛衛大將軍克己字安仁以宗室子名知
音上遣使卽其家俾製黃鍾大曲將軍疏牘論次成不
淹暑使者還奏大蒙賞嘆又進別曲十餘解徃徃流布
樂府將軍自爲兒時已能言五音十二管夫婦上下相
生之法君臣清濁之差汪洋闔行支脈連著皆有所從
繪爲律呂圖奏御其心解神悟殆天性然者習羲之草
世南隸楷尤工會天子族讌酒中被詔試虞楷并有所

賦將軍旣感千載之逢矜稽古之習援筆足言爛然盈
幅上益嘉之厚以金帛爲賞嘗第所自爲詩三百篇行
于時他日寢疾內夫人傳旨撫存將軍以寵待異等頓
首泣謝曰臣死不恨遂歿天子輟朝嗟悼贈深州防禦
使進封饒陽侯自歛訖殯無慮所須一從官給嗚呼終
之令而哀之榮謂將軍也歟顯考諱承壽均州防禦使
祖考諱德恭高密郡王郡王之禍則秦悼王燾後隕此
源長而根殖也夫人長寧縣君武氏生三子叔詔叔廣
竝太子右監門率府副率叔褒太子右內率府副率慶

歷四年既克葬燕王凡諸下之未兆者皆舉從之別遣
內常侍將柳而南如汝州之梁縣敘安于先塋史臣被
詔刻石著將軍之行宜無愧辭銘曰
性也重厚不聲以色服也儒術惟敏而力仕由廷臣七
遷厥官階崇爵顯勲峻戶蕃謂仁必壽胡不我信侯年
四十嗒然委順孟夏癸卯克葬我侯息焉于此運往名
留

皇從兄贈虔州觀察使墓誌銘

秦悼王之穆曰廣陵郡王王之合曰南陽郡君張夫人

有子八房嫡房曰贈虔州觀察使曾禰不書尊帝也王
諱不書著也公名承睦以皇根之茂天跗之華芳酣烈
飪遂用蕃衍直質而不踰遜志而自修斤斤奉法日以
飭厲守貴而無驕色處樂而無流心自右侍禁踐八官
而至左領軍彭州團練使朝家厚宗室悉留京師雖疏
爵而王列藩而侯揭節而使佩印而相未有就國而操
事也不就國則親親之誼戚而弗疏不操事則優優之
祿肆而弗畏有如公高冠大帶朝殿祀之下量幣黃流
祀家寢之庭資忠移孝靡有罪悔奚其爲政而後爲之

功業哉命之弗讎享年四十有八天子輟朝行臨弔之
禮中人奉詔護喪窆之事出中帑以襚之厥廉車以飾
之棺于寢階殯于蘭若須時也後三年歲直甲申分遣
使者啓敢柩卜夏四月癸卯還葬汝州之梁縣以夫人
隴西郡君董氏祔焉男六人克順克戒太子右衛率府
率克協克凝克伸右監門衛率府副率克橐右內率府
副率有詔史臣銘其壙銘曰

鬱鬱芊芊惟汝陽兮若斧若堂從家王兮子也承祀其
代昌兮

李郡王墓誌銘

皇祐二年秋七月有宋元舅彰德軍節度使檢校太尉
兼侍中李公用和以羸疾聞太醫更往治弗損丙申乘
輿臨問公病不能束紳臥簣泣謝上念公居告久又素
不殖產賜銀三千兩爲醫祝費斥官舍百餘區歲餼二
百萬與之使長食其貲卽賜所居爲公第又以次子西
上閣門副使珣爲正使二子一孫未仕者賦其祿皆拜
牀下甲辰公薨上震惻是日臨弔哭且慟贈稅絡繹遺
命辭詔葬故遣近侍及中大夫職喪事冊贈太師中書

景文集 卷之九 九 終贊
令隴西郡王五日不視朝賜諡曰恭禧王子帝舉哀苑
次將卜葬以八月甲申吉諸子號踊荒痛乃庀具有詔
葬日以本品鹵簿寵之又命史臣次王之行鏤石藏于
隧謹按王字審禮系出隴西遠祖徙餘杭既又來京師
故今土著始爲開封人曾祖諱應己隱不自名曾妣曰
沈夫人祖諱延嗣舉進士乙科終金華主簿祖妣曰汪
夫人考諱仁德以進士試有司數訕晚乃選爲三班奉
職終左班殿直妣曰章夫人惟夫人克生元女嬪帝誕
聖柔風順教佐治六宮終享大號祔主廟祔是爲章懿

皇后前後延賁三世竝以太師中書令兼尚書令告第
以舒邢魏爲三公國吳陳楚爲三太夫人國廡鈿刻章
羅照窰塗王卽后母弟少孤內行修謹釋褐衣召爲廷
臣試事連最益知名以右侍禁閣門祇候出監考城兵
明道元年會章懿喪除禮賓副使其年大考官室以分
護勞正爲禮賓使明年改治后陵王參相奉安帝念后
昆弟惟王思有褒寵故擢崇儀使兼賀州刺史將曠騎
輕兵護梓宮明年詔王親展寢園還爲寧州刺史改刺
澤州并本州團練使又遷慶州加防禦使拜鄜州觀察

使自質及鄜不卽州領皇城兵寶元二年仍使號充殿
前都虞候俄加永清軍節度觀察留後以帥職出爲真
定府定州路兵馬副都部署踰年遷侍衛親軍步軍副
都指揮使更爲兵馬都部署召還視本司事未幾改帥
馬軍慶歷二年拜建武軍節度使充殿前副指揮使久
之以建武節進檢校太傅充宣徽北院使不踰月授彰
德節同中書門下平章事王旣尊戚慎將當日進見省
戶下故不之鎮留爲景靈宮使居再歲升門下二品王
臨事強敏然性靜畏見可以佐縣官者避戚屬未嘗顯

爭得失率一二密對故外莫得聞不爲狗馬玩好驅馳
弋獵不立居宅檢御姻族使循法度此則馬廖之慎也
先后之啟故陵瀝泐方中詔王按視中外爲懼王不一
辭措枉于人物色申右帝意解故簿主者罪往往得原
此則樊宏之畏也前後居爪牙任爲國禦侮巖廟尊榮
不疎不譁退視徼道按周廬省幕府文書惟謹建白時
當有司率爲故常在河北尤善撫士修完器械勉怯爲
勇易單爲牢悉公錢享部校僚屬無留私景祐中再郊
王兩爲大內善守此則申伯之武也初王無第詔權舍

芳林園王以禁籩非人臣所居固辭更假今第此則竇
長君之能讓也領殿前兵歷四碁後數請閒避劇任帝
曰叔舅誠年高尚煩以職事非所以優之由是開府視
宰相每朝會大宴與執政聯坐鳴玉珥貂進退恂然親
寵第一嘗屬疾輦過候安否勉醫藥賜予千疋又以王
經過郊墅別賜銀飾安輿此則鄧騭之貴也大抵外戚
在朝廷預進退士干議論則近權權且有黨滋貨買田
廛四方餉謝則近侈侈則多求王居常謝賓客罕所薦
進朝或大議論不敢知故無黨無黨則權不往用度一

出俸稍抑絕甚其爲子孫謀盡仰所賜產故求宜求
寡則侈不至且王肺腑要重苟有閑說干上勢宜聽糜
金錢嗜所欲厚自奉養人亦無所詆疵而天資儉約終
不舍此爲彼使屬任之恩始終蔭密不曰賢哉凡功臣
號再加階光祿大夫勲上柱國爵開國公虛食邑四千
戶夫人王氏以淑懿之行助宗事幹內法偕王之貴封
榮國夫人生男子九曰璋珣琚琦瑋瑋球瑛某璋爲眉
州刺史兼防禦使領龍神衛四廂都指揮使珣卽前拜
閣門使者琚琦瑋球皆任內殿承制崇班瑋爲濱州刺

史初上欲與王世爲甥舅故詔瑋尚福康公主主待年
瑋前拜駙馬都尉瑛爲東都供奉官早夭贈如京使某
州刺史或以沈果進或以敏幹聞或以謹厚選其能濟
王之美而不隕也惟邢公而上墳墓在餘杭自魏公始
塋開封府祥符縣鄧公鄉原窆于昭位今克葬王于魏
公之左爲穆位禮也昔秦康公以路車乘馬贈送晉侯
作渭陽之詩人微事陋仲尼以爲可傳追什其風况乎
寵外家褒哲輔卹終表賢儀物典冊光明肆大極天子
親親之恩慰先后在天之慈庸得不識銘曰

王之先赤舄紉紉乃自餘杭引而北遷允顯魏公賜始
家田度沐之陽大表厥阡王之貴照發于他帝所自出
親則舅家忠力謹庸福祿是荷台臣之印上將之牙王
之亡帝慟且傷五不視朝哀襲總裳師令王爵迫密厥
章歸賄易名恩縟于常王之葬圖于塋穆既有秘器飯
珠贈玉鼓吹轟錚旂旒熠煜我且不朽彼則陵谷王之
後洗洗而榮或築外館有提衛兵佩鏘其珩冠翠其纓
爾公爾侯永嗣家聲

文正王公墓誌銘

景祐二年丞相右府缺上方圖任者俊參付魁極越二
年制詔太原王公會其上樞密使印綬還來用予進拜
尚書右僕射門下侍郎所以命賜之尤渥公拜稽首讓
弗遂于是擇典訓庸以熙百工外懷邇協以種九德飪
味燮和辰階比平翼戴聖猷溥大光明迺十一月從欽
天柴胙沂以爲公國他日請間伏青蒲上陳瘁爾嬰霜
露以陪願前此納政避賢人路帝憮然無開可意公執
不奪卒改左僕射加資政殿大學士鎮東平戊寅仲冬
感疥門子謁急書聞亟命將高手醫跳驅趣視不半道

丙午公薨上推甲子得三百六十六復所生之辰家丞
列治讓還鴻臚典葬天子悼遺老之弗憇也再昕置朝
廡左貂以禘法贈備厚恩錄宗姻僚陪十人容官合文
正二言以謹周道公之喪來京師其引也蓋殯也邦人
官師沲涕相弔明年有司持丁亥詔書刊公第仍舉中
書令密章以告愍冊焜煌再漏下泉本公之綢繆感會
寵存賁往有以致者其如仁歟其司直歟公字孝先由
逸民霸飛遁天漢顯基素德支裔屢徙今爲青州益都
著姓曾祖諱鐸祖諱繼華皆陰儲世烈考諱兼甘節難

進終著作佐郎深根浚源藜浦來祉公貴推澤竝贈開
府儀同三司尚書令中書令爵皆爲公大王父國于越
父國于魯妣曰張別贈燕夫人曰何爲魯夫人公卽何
夫人之子軒渠卓異魯公曰是大吾門八歲終二喪斬
焉致毀仲父宗元育之過所生一情以均公亦以所愛
事仲父如父甫冠與鄉士游汎博書記不爲章句儒諸
老先生皆折輩行以交咸平中偕郡上計委符入關策
進士再爲天下第一當此時二篇賦學者爭傳都紙以
鷓鴣王佐期之初命將作監丞通治濟陽代還試政事

堂以大著作直太史服五品判三司戶部案轉右正言
知制誥服三品充史館修撰入翰林爲學士自司計外
郎再遷至中兵拜諫議大夫參議大政加給事中以禮
部侍郎守應天大名兩府復貳鼎席兼太子賓客由左
戶再遷至春官卿以內書侍郎執宰相筆陟東臺兼地
官遂躋上袞閱五歲琳宮火一旨焚冊災異免以天官
爲本州又易天雄軍卽拜彰德軍節度使檢校太尉稍
換天平軍檢校太師俄同中書門下平章事徙判河南
府入冠樞極罷幢棨還冢宰他如故公由布衣豈君門

身文集 卷五 三 總 督 校
譽處時行爲龍光景式凡三十七年別任九判大理尚
書都省登聞檢知審刑審官禮儀院通進銀臺司門下
封駁事泣三班院糾察在京刑獄領使五持金絮遺渥
水酋爲生辰使輦謁譙祠爲攷制度使館寓神嶽以中
台爲會靈觀使高真寶符以元輔爲玉清昭應宮使再
見上帝爲南郊大禮使主工部一由集賢殿昭文館及
西清之秘爲大學士三監修國史一階一品勲十二轉
表功十有四字食虛邑萬有二千五百室實五千一百
室此踐揚隆赫其大較也初契丹侵邊濟爲寰服最

早符晏檄悉索賦佐軍興公由倅事疏一二便宜數奏
蒙可衆器其能天禧夜妖自三川相靡而東公守睢陽
不逞謹恐里閭晝闔公闢牙門分吏曉勒捕先倡者鞭
梏之妖熄不復南築雒都城周萬雉雲障言言辰居以
尊復陝路轉粟歲二十萬饑得無乏歲旱蝗齊楚周什
八以上民曹逃貸困粟鄉縣株送公一切勝遣流瘠更
生以千計所至立學官分租俸助興作五州鑿金石以
頌魏人畫像事之諫治者以公爲尤緣圖夜降度宮以
儀典客礮石庀材規創萬楹公列五害願省損制度奉

承大中之意先帝弗豫太子已決事或議長秋臨政儉
人甚語翕翕公時調護儲邸謂后姻倖曰太子長秋謹
不獨立有如兩宮相維社稷安矣后悟由是內外恭順
無違言莊獻總軍國儀不時立佞黨投罅廷議放肆公
獨引東漢故事朝則帝在左太后在右施簾自障羣臣
奏事如前詔如公請長樂上徽冊供張天安殿中公執
不可改御文德差損展座志在彊王室安外家使無纖
芥納忠者以公爲藎大理總天下獄異時爲冗帝欲重
之公自西臺被選平亭訊讞許自辟丞屬遂踵爲故事

法家有違制而情不一公請非親被以失論會具獄須
報公據前例帝曰自是無復有違制耶公曰如陛下言
亦無復有失者帝悅更從輕坐語材者器公之果踐內
外辭禁贊爲名命渾灝炳純溯古同風或選爲昌言或
永爲賡歌則家集合五十六篇詳矣上始鄉學公采聖
君賢臣事繪解爲三十篇因以勸成德美語鏤于槩徧
賜邇臣其他纂次尤多尚不錄言文者歸公之洽嗚呼
惟公侃然正崖然立周密靖慎久而無流心在上前開
陳處可辨博有餘言爲國家用至日盱出沐燕私訖不

道省中語天資方重每廣朝大會盛服玉色郎謁者視
進止如有尺寸未嘗過缺雖妄庸人歷嗤詆亦不能加
半言毀短于公當國七年萬物茂宜四夷休寧稼茨于
原兵仆于鄙嘉生回薄無有恫怨務大體若丙吉清淨
如曹參總領衆職如魏相內文明如鄧禹于時被公之
化察察者敦沾沾者愧建啟露門秘禁召惇儒碩老侍
擿勸講復諫署舊員使正辭審議日興于朝進賢不植
私愛士不謀黨退不肖不奸怨奉羣母孝與諸弟友親
族可任言之上不可任厚分之財姻婭進用皆以嫌自

退上嘗大署忠亮忠厚四字錫之天下稱爲賢公乾興
天聖之際時多故矣身荷重任爲國休戚雖參和傅會
權定大事積彼怒牙浣其他腸底焉如幘幘慮焉如著
蔡然至閔舌獨念猶感慨以之是必彌綸之才軋于羣
媚而未悉獲騁健粹之氣有所難屈而弗慊于心煩慮
焚和且至大病斯可憫已先時大星辰落郡寢上左右
驚白公曰後一月乃自知之如期而始悟寧傳箕蕭昂
有憑以始亦有以終耶君子謂爲知命公始合姓于蔡
實處士光濟之女又合姓于李故相文靖公之女卒繼

室以其妹芳猷淑則迭映中壺後夫人獨偕公老故啟
許國享脂田焉書哭未朞又不幸以綸衣而復母弟曰
皞字子融爲刑部郎中直集賢院曰憫字孝德終國子
博士子四人曰網緣繹縝網止光祿寺丞緣天闕縝止
將作監丞繹爲光祿寺丞繹之幼公取皞子繹以嗣及
終又命之故繹卽喪序今爲大理寺丞祕閣校理公之
捐館以大墓無穆位不可以葬乃改卜于滎陽惟新鄭
吉又筮于臨濟鄉惟梁原吉先是蔡夫人之歿已祔于
姑歲在單闕冬十月乙酉子融與繹等竭誠信舉公及

二夫人之喪含窆新阡順也且求狀于太子中允直集
賢院富弼又自哀公行事一篇合前後贊書見授而爲
之誌恭惟令君之德在生人其憲度在臺閣其言在謨
命其履踐在國書其人與不可傳者皆亡矣今所摭次
始舉潛紳所道者著于篇而納之壙中銘曰

斤斤令君竭來山東利見國光參偶時龍旣奮厥庸遂
爲宗工訂平津之封兮上初纂嗣母闈參治揭日當天
實相以濟讒辱不搖王室無基賴陳平之智兮五藩于
宣旣仁且賢邦民宜之厥猶茂焉乃建將牙乃示台躔

繫吉甫之憲兮鄭圃聯圻泉塗啓扉刻章美檟終天此
依九京千載景仰餘徽惟隨武之歸兮

僕射孫宣公墓誌銘

聖上嗣位之初丕承淳烈將以雍言布度召雋老惇儒
入崇政殿中以興金華之學時惟樂安孫公爽嶠顛魁
擧授道帷幄辰告日躋淵靜揚休出入十年厥猷茂焉
乃天聖辛未歲以惇暮告勞上還所事天子雅貪公肅
艾之望倚以訪逮需奏三上皆不報公面自陳啟頓顙
流泣帝爲改容第許以兗州之章申几杖之俟猶命講

老子三章重以束帛乘馬襲衣鑲帶命賜備厚沖概以
光乘輿燕于太清樓別詔近臣餞于瑞聖苑救預會者
賦詩必類且錫天什寵賁其行師臣禮遇尊無與二公
居東一年上書求謝悃悞確朝議重違進拜太子少
傅以安車還汶上明年夏五月感疾甚篤己丑奉裨衣
復于東榮實明道癸酉于是公之生七十二年矣訃聞
帝震悼廢朝制贈文昌左相贈泉二十萬錄孤若孫一
官易名曰宣嗚呼哀與榮更相終始其所以得之者有
猷有爲故耶公字宗古代爲本郡著姓由公徙居于鄆

今又爲鄆人諱霸曾王父也練王父也翌烈考也饒夫
人嫡妣也丁夫人繼妣也率祖而上皆毓德丘里不經
世務考槃在志以篤睦肥家叢鬱慶祥侯公而發烈考
累封光祿少卿致仕贈兵部尚書二夫人以都陽濟陽
二郡賁湯沐之典從子貴也公強志精力爲諸生時已
通五經之說百家之藝游長者間久之名聞京師端拱
中擢明經高第自釋褐闕十七官更五職咸以最顯由
莒縣主簿授廷尉平參大成均之屬轉本寺丞遷尚書
省又講經于諸侯王邸升奉常爲博士入尚書臺爲屯

田都官職方三員外以司平中兵二郎中待禁閣之制
改諫議大夫給事合六官踐其四以小司空累遷至太
宗伯竝兼玉堂講勸之任小司馬時又帖秘圖侍從之
職裕于德而膺于仕也蒞十一局爲審官三吏銓三班
各一其啓擬無滯材署銀臺封駁再判國鼓一其進退
無壅情糾京獄罰以麗使牧校騶斯材總大農事以給
太常太學客官皆洊領焉舊章之不忘抑公是賴三守
邦治高齊五年孟津三年魯郡再竝葺年仁厚愛利除
一切之禁風聲化條爲二千石表簡任之尤者則章聖

上封之歲假節境上諭安遜人通聘于鑿無閭之落又
接其使于藁館道二國之言無私冊號鬱蒼介使輶之
華程較俊選精官材之辨增修商苑舊任寵其遺利歸
之縣官十累階止正奉大夫七論勲至上柱國開國爵
爲公食邑稱是其發揚烜赫如此在太宗時輦過庠舍
公自下陳捧經升階講說命三篇因古順諷音旨華暢
帝大褒挹卽賜五品袍魚羣聽始竦在真宗時屬柴采
岱橫河汾擁符瑞之富羣臣爭欲推天意興希闕之事
天子方憑翠帽彷彿瀨鄉之區眇然以思聖真之遺風

公獨建言危微之本志乎所忽且引唐開元終悼後艱
爲戒帝亮其懇至多所開納然猶著論以剖公之疑侍
郡國多上瑞物公間得見具言珍禽異卉爲和氣所蔓
以昭盛德然脫有竄僞非應天之實又言道家祠醮所
費不貲以愛畜財用爲急書數十上啓心進熟靡所回
隱皆可以紓國庇民興天下長利卓然有古風烈彼齷
齷容容毋忠固意且不得與公徒隸齒真可愧也及在
經省則取無逸篇繪圖以進詩書道前王喪亂進讀者
臨文卹忌或粗畧含糊公獨不然必爲正言之冀以多

誠故常有所裨勸能納君子善矣公之典禮也始請無
祈穀而後農冬至侍祠于郊以天神醊食宗廟復二舞
雍徹孔廟三獻有旨迄今奉行爲故事唐禮祈穀大雩
大饗竝祀昊天五帝國朝因之公上言位號重複不合
正禮且天無二帝特以五時生育之功強爲六名冬至
圓丘宜罷五帝位孟春禘感帝位日于東月于西以會
禮家大報天主日配以月之文雩饗宜祀五帝不設昊
天攢題事下有司咸謂祀爲大事舉而廢之不以疑定
議卒報罷然服公論據精洽願下其書于史館則神不

瀆矣初公患五經章句浮長剛爲節解數百篇取九經
之治要著微言五十篇實被詔牌作樂記圖承詔撰崇
祀錄次五服年月爲一家之言奉和兩朝聖製著賡載
集體尚沈雅不爲華藻自七經之疏皆與刊正史志子
篇律學未鏤官藪以次建白自是流布學者仰之殆如
杓然終始典于學矣舉動溫重外和而內莊譬于莫在
匣隱然常若可畏何隆名重器不植黨援而盜言哆箕
無所奇中由慎密以自將歟性純孝篤于溫肅旣荷囊
再筆朝夕禁近不得休沐過家而烈考尚書又重去鄉

里歲時上壽公弗及預數上書辭官從養帝頗難之于是有左符之授再徙地益東蓋公志也尚書年過九十公亦耆指使尚就子舍曳班裳言不稱老養者以爲榮及時侍疾也不嘗藥不進不復飯不甘鄒魯之人多能言其行練達臺閣制度有咨無不得判議者以許東京胡廣而持正過之善知人精于評鑒今左戶二卿始平馮公初在黃綬公亟薦于朝至于光大發舒綢繆累與接武露門俱名儒宗及馮浴堂之召遂讓其班而公下清議咨美其他推轂士甚衆雖未大顯皆林有今

聲俊又用章繫公爲重處約居易讓夷難進不疚利于回不愧祝于辭甘是介節訖無恫悔及菟裘之還也召鄉人諸父揮金以爲歡海鯤冥鴻所造而適撒瑟之外前處正寢以諗考終之期物怪氣焰罔形請禱獨召子姓以授治命屏御不使進且曰以齊吾終遺禮嗒倦止于獻納傳稱得正而斃焉斯已矣又云旣歿其言立此之謂不朽如公實參有之夫人天水趙氏服珈鈿之華能循法度老不逮享追封本郡三子長曰瑤次曰珪季曰瑜由公任各以材力進瑤歷司虞員外郎珪爲屯衛

丞竝早世瑜今爲殿中丞諸孫逮公之廕爲卿寺屬者
五人殿中君以公殯之未耐求爲本州賓介休懼懼恒
奔問于陽卜得今丙子歲冬十月癸酉吉奉公及夫人
之喪克窆于某縣某鄉某原從先塋之穆位順也以祁
曩爲經生實被公薦參掌儀署又節惠以舉周法知公
之績也熟見託論譔是用次敘其行而納于窆塋銘曰
猗歟公之文慮憲秉彝式是古訓進爲經師挾策立言
刪剟游枝舉其蕤兮猗歟公之仕丁辰展美其弁頤然
其纓華止不蹈九折安我六轡坦斯履兮猗歟公之德

方嚴直清鎮浮含厚不伐存誠匪躬蹇蹇受命青青時
則行兮猗歟公之老在汶之陽貴屏國爵宇發天光弋
昔何慕鶴鵬已翔壽俾臧兮我鬣封兮序先域纍密璽
兮照電窆子克荷兮孫繩繩奉二尊兮安此宅褒善猷
兮刻沈砥心可泐兮名無垠

景文集卷五十八



